

ዳኔል ቲንቢቲ ጊዶ ቆፋ

ዳኔል ማጻፋይ ጸፊቲዳይ ካሴ አይሁዳ ዴሬ አሳይ ሃንኮ አራማዌታ ካዎ ጋርሳን ጎዴቲሊኔ ጊታ ሜቶይ ኢስታ ቦላ ጋኪዳ ዋዴ፤ ሄ ዋዴ ጸፊዚ ታሪኬታኒኔ ባ ቤኢዳ አጂታታን አሳ ሚንፌፌስ፤ ጸሲ ሄ ዋልቃራ ዋዴሲ ሃሪዛይሳ ዲጊዲ ባ ዴሬዛስ ካሴ ቦንቸዛ ዛራናይሳ ሂዶታ አሚዴስ። ሃይሲ ሃ ማጻፋዚ ናምኡ ኪፊሊን ሻኬቲስ።

1. ዳኔሊኔ ኢዛራ ኢሲፌ ዲኤቲ ቢዲ ዲዛ ጉላ አሳታስ ጸሳ ቦላ ዲዛ ሚኖ አማኖኒኔ ኢስቲ ኢዛስ አዛዜቲዛ አዛዜቲላን ኢስታ ሞርኬቲ ዬላቲዳይሳ ዮቴስ፤ ሄሲ ሄ ታሪኬዚ ፖሊቲዳይ ባቢሎኔ ካዎቲላ ዋዴን ፓሪሴ ካዎቲላ ዋዴ (1-6)።

2. ዳኔሊ ቤኢዳ ዲማ ዲማ አጂታታ ጊዲሺን ሃይቲካ ባቢሎኔ ካዎፔ ደሚዲ ዲማ ዲማ ካዎቲ ካዎታናይሳኔ ኩንዳናይሳ፤ ቃሴካ አራማዌ ዴሬ አይሲዛይቲ ሙሊራ ዲፒ ጊ ጳዪን ጸሳ ዴሬይ ካሴ ባ ዲዛ ዴሬ ሲሚ ጌላናይሳ ለሚሶን ቆንጨሲዛ አጂታታ ኦይኪዴስ (7-12)።

ሃ ማጻፋይ ኦይኪዳ ኩሜሳ ቆፋ

ዳኔላኔ ኢዛ ላጌ ሄቫታ 1:1-21

ካዎ ናቡካዳናጾሬ አጉሞ 2:1-49

ጸሲ ሲዲራቃ፤ ሚሳቃኔ አብዲናሳ ታማፔ አሺዴስ 3:1-30

ጨቁቲላ ካዎ ናቡካዳናጾሬ ቦላ ጋሊዳ ሜቶ 4:1-37

ካዎ ቤሊሻጾሬኔ ኢዛ ኬላ ጎዳ ቦላ ጸፊቲዳ ቃላ 5:1-31

ጸሲ ዳኔላ ጋሞ ዶናፔ አሺዳ አሾ 6:1-28

ዳኔሊ አጂታን ቤኢዳ ኦይዱ ዶኣታ 7:1-28

ዳኔሊ አጂታን ቤኢዳ ጳርሾኔ ዴይሻ ኦርጌ 8:1-27

ዳኔሊ ባ ዴራስ ዋሲዳ ዋሳ 9:1-27

ዳኔሊ ጸግሮሴ ሻፋ አቻን ቤኢዳ ጸሳ ኪታንቻዛ 10:1—
11:45

ዳኔሊ ዋዴ ዉርሴላ ጊሻስ ቤኢዳ አጂታ 12:1-13

ናቡካዳናጾሬ ካዎቲላ ኬላን ዳኔላኔ ኢዛ ላጌታ

1 ካዎ ኢዮአቄሜይ የሁዳን ካዎቲዳ ሄሻንሉ ላይላን ባቢሎኔ ካዎ ናቡካደናጾሬይ ዬሩሳላሜ ደዲደሰ።

2 ጎዳይ የሁዳ ካዎ ኢዮአቄሜ አማርዳ ጸሳ ኬላ ሚሻታራ ኢዛ ኩሼን አሊ አሚደሰ፤ ኢዚካ ባ ጸሳ ኬላን ዋላና ሳናኦሬ ኤፊደሰ፤ ኢዚ ዲኢ ኤፊዳ ጸሳ ኬላ ሚሻ ኡባካ ባ ኤቃ ጸሳታ ሚሼ ዋሊዛ ኬላን ዋሊደሰ።

3 ሄሳፌ ጉዬ ካዎ ናቡካደናጾሬይ ባ ኦሳንቻታ ሃላቃ አሽፌናዜይ ካዎሶ አሳፔኔ ዳናታ ዜሬላፌ ጊዲዳ ኢሰራኤሌታ ኤሃና ማላ አዛዚደሰ።

4 ሄ ዶሬቲዳይቲ ናቴሊኔ ካዎ ኬላን ኦላናሰ ዳንዳይዛ ኤራቴሊ ዲዛይታ ጊዳና ማላ፣ ማላ ሎኦታ፣ አቶ ኤራቴሊ ዲዛይታ፣ ዩሺ ቆፐዛይታ፣ ኡባ ኤሶን ኤኪዛይታኔ ኢሰታ አሳቴላ ቦላ ቦሬይ ባይንዳይታ ጊዳና ማላ ቆፍሲደሰ፤ ሄይታ ቃሴ ባቢሎኔ ቃላኒኔ ሄ ዴሬ ቃላን ጸፎ ዋጋ ታማርሳና ማላ አዛዚደሰ።

5 ኢሰቲ ማና ካሊኔ ኡያና ዎይኔ ኡሺ ካዎዛ ማዳፌ ጊዳና ማላ አዛዜቲደሰ፤ ሂሰቲዲ ሄሹ ላይሉ ታማሪ ኤሪዳፔ ጉዬ ኢሰቲ ካዎዛ ሲንሐ ሺቂዲ ካዎ ኬላን ኦላና ማላ ዮኦይ ቃሼቲደሰ።

6 ሄ ዶሬቲዳይታ ጊዳፌ የሁዳ ቆሞፌ ዳኔሊ፣ ሃናኒያይ፣ ሚሻኤሌይኔ አዛሪያሲ ዪዳ።

7 ካዎዛ ሹሜታ ሃላቃይ ኢሰታ ሱንላ ላሚዲ ዳኔላ ቢልጸሶሬ፣ ሃናኒያ ሲዲራቃ፣ ሚሻኤሌ ሚሳቃ፣ አዛሪያሳ ቃሴ አብዲናን ጊ ሱንሊደሰ።

8 ዳኔሊ ካዎዛ ማዳፌ ሚዲኔ ዎይኔ ኡሻ ኡዪዲ ባና ቱኒሶንታ ማላ ቆፋ ቃቺደሰ፤ ሂሰቲዲ ሄሳ ሄ ቆፋዛ ኤሮ ጊ ኤካና ማላ አሽፌናዜ ዎሲደሰ።

9 ጸሲ ዳኔሊስ ሹሜዛ ሲንላን ቴማ ኢሚዲ ቃጴታና ማላ ኦሊደሰ።

10 ጊዶ አቲን አሽፌናዜይ ካዎዛሰ ባቢዳ ጊሻሰ ዳኔላሰ፣ «ኢንቴ ማና ካሊኔ ኡያና ኡሹ ኢንቴሰ አዛዚዳይ ካዎዛኮ፤ ኢንቴ ቃሴ ሃንኮ ናቴላታፔ ጊልቂዲኔ ላፊ ቤቲኮ ካዎፔ ኢንቴ ቦላ ሜቶ ጋሲሳና» ጊ ዮቲደሰ።

11 ሄሳፌ ጉዬ ዳኔላ፣ ሃናኒያ፣ ሚሻኤሌኔ አዛሪያሳ ናጊ ካሐ ሚዛና ማላ ሹሜታ ሃላቃ አሽፌናዜይ ዎሲዳዬኮ ዳኔሊ ቢዲ፣

12 «ኦኒ አታኪልቲ ሚሼኔ ሃሐ ኡዪሼ ጋምኦና ማላ ኔ ኦና ኔ ኦሳንቻታ ኣኔ ታሙ ጋላሰ ጋካናሰ ፓጫ ቤያ።

13 ሄሳፌ ጉዬ ኑና ሃንኮ ካዋዛ ማዳፌ ሚዛ ናቴላታራ ጋላ ፓጫ ጸላዳ ኔ ዶሲዳዝ ኑ ቦላ ኦላ» ጌደሰ።

14 ኢስታ ናጊዛይሲካ ሄ ቆፋዛ ኤኪዲ ታሙ ጋላሰ ጋካናሰ ኢስታ ፓጫደሰ።

15 ሄ ታሙ ጋላሳይ ወሪዳፔ ጉዬ ካዋዛ ማዳፌ ሚዛ ናቴላ ኡባፌ ኣጲዲ ኢስታ ኣሳቴላይ ሎኢዲኔ ኦርዲዲ ቤቲደሰ።

16 ሄ ጋላሳፌ ዶሚዲ ኢስታ ናጊዛይሲ ካዋ ማዳፌ ኢስታሰ ዪዛ ሎኦ ቁማኔ ዎይኔ ኡሻ ኣጊዲ ኣታኪልቲ እሞ ኦይኪደሰ።

17 ጸሲካ ሄ ኦይዲ ናቴላታሰ ኣጵ ኤራቴላ፣ ጳፎ ኤራቴላኔ ኣኬካ ኢሚደሰ፤ ዳኔላሰ ጊዲኮ ሄሳፌካ ቦላራ ኣጂታኔ ኣጉሞ ቢርሺዛ ኤራቴላ ደሰ።

18 ካሴ ካዋዚ ዎሊዳ ሄዡ ላይላይ ጋኪን ኣሸፌናዜይ ሄ ናቴላታ ኡባ ኤኪ ኤፊዲ ናቡካዳናጾሬ ሲንላ ሺሺደሰ።

19 ካዋዚካ ኢስታ ኡባ ሃሳይሲዳ ዎዴ ኢስታ ጊደፌ ዳኔላራ፣ ሃናኒያራ፣ ሚሻኤሌራኔ ኣዛሪያሳራ ገናቲዛ ኣሲ ቤቲቤና፤ ሄሳ ጊሻሰ ኢስቲ ካዋዚ ሲንላን ኦላና ማላ ዶሬቲዳ።

20 ካዋዚ ኦይቺዳ ኣይ ኣጵ ኤራቴላኒኔ ኣኬካን ኢዚ ኣይሲዛ ዴሬን ዲዛ ማርታፔ፣ ሳጋታፔ፣ ታሙ ኩሸፔ ኣጲ ቤቲዳ።

21 ዳኔሊካ ፓሪሴ ካዋ ቂርሲ ካዋቲዳ ኮይሮ ላይላ ጋካናሰ ካዋቴላ ጋርሳን ኦሊሺ ጋሞኢደሰ።

2

ናቡካዳናጾሬ ኣጉሞ

1 ናቡካዳናጾሬይ ካዋቲዳ ናሞኣንላ ላይላን ኣጉሞ ኣጉሜቲደሰ፤ ሄ ኣጉሞዛ ጋሶን ኬሂ ጩጪን ጲሰኮይ ኢዛሰ ጳይደሰ።

2 ሄሳ ጊሻሰ ኢዛኮ ዪዲ ሄ ኢዛ ኣጉሞዛ ቢርሺላ ኢዛሰ ዮታና ማላ ማርቲ፣ ሳጋቲ፣ ሙሬኒዛይቲኔ ጸለንቲ ታይቢዛይቲ ጴይጌታና ማላ ኣዛዚደሰ፤ ኢስቲካ ዪዲ ኢዛ ሲንላን ኤቂዳ።

3 ካዋዚ ኢስታሰ፣ «ታኒ ኣጉሞ ኣጉሜታዲሰ ሺን ሄ ኣጉሞዚ ኢዚ ኣዛኮ ኤራናሰ ታኒ ኬሃ ጩጫዲሰ» ጌደሰ።

4 ጸሊንቴ ታይቢዛ ኤራንቻቲ ካዎዛሰ፡ «ካዎይ ሜርናስ ካዎቶ! ኔ አይ አጉሜቲዳኮ ኣኔ ኑስ ዮታ፤ ኑኒ ኢዛ ቢርሼል ኔና ኤሪሳና» ጊዲ ኢዛሰ አራማይኬ ቃላን ሃሳይዳ። *

5 ካዎዚካ ኢስታሰ፡ «ታ አጉሜቲዳ አጉሞዛኔ ኢዛ ቢርሼል ኢንቴ ታሰ ዮቶንታ አጊኮ ኢንቴ አሳቴላ ሙዴሬላዳኔ ኢንቴ ኬላታ ፒሰኪ ሂሰታ ላላ ዬጋና።

6 ጊዶ አቲን ኢንቴ ታ አጉሞዛኔ ኢዛ ቢርሼል ጋሊ ታሰ ዮቲኮ ታ ኢንቴሰ ኢሞታ፡ ዎይቶኔ ጊታ ቦንቾ አማና፤ ሄሳ ጊሻሰ ታ አጉሞዛ ኢዛ ቢርሼላራ ታሰ ዮቲቴ» ጊ አዋጂዴሰ።

7 ኢስቲካ ዛሪዲ፡ «ካዎ! ኔ አጉሞይ ኢዚ አዛኮ ኑስ ኔ አይሌታሰ ዮቲኮ ኑኒ ኔስ ኢዛ ቢርሼል ዮታና» ጊዳ።

8 ካዎዚ ሄሳ ሲዪዳ ማላ፡ «ታ ኦላና ቃቺዳይሳ ኢንቴ ኤሪዳ ጊሻሰ ኢንቴ ታ ቆፋ ጋሞኢሳናስ ሃኒዛይሳ ታ ኤራይሰ።

9 ኢንቴ ታሰ አጉሞዛ ዮታናስ ዳንዳዮንታ አጊኮ ኢንቴሰ ኡባታሲካ ኢሲ ማላ ቁጻቴይ ጊጌቲ ኡቲዴሰ፤ ዮኑቲ ኢንቴሰ ላማታና ሚሳቲን ዎርዶኔ ጌኔ ቃላ ሃሳያን ጮ ሚላ ዎዴ ዉርሳናስ ኮዪዴታ፤ ኮይሮቲዲ አጉሞዛ ኢንቴ ታሰ ዮቲኮ ኢዛ ቢርሼል ኢንቴና ዎዪሶንታይሳ ታ ኤራይሰ» ጊዴሰ።

10 ጸሊንቴ ታይቢዛ ኤራንቻቲ ኢዛሰ፡ «ካዎ! ኔ ኦይቺዳይሳ ኔስ ዛራና ዳንዳይዛ ኣሲ አላማ ቦላ ቤቴና፤ አይ ካዎይካ ጊታኔ ዎልቃማ ጊዲኮካ ሃይሳ ማላ ኦይሾ ማርታ፡ ሳጋታኔ ጸሊንቴ ታይቢዛ ኤራንቻታ ኦይቺ ኤሬና።

11 ካዎ! ኔኒ ኦይቺዛ ኦይሻይ ኬሂ ዴጾ ጊዲዳ ጊሻሰ አሳራ ኢሲፌ ዶንታ ጸሳታፔ አቲን ኣሲ ኔስ ቆንጪሳናስ ዳንዳይና» ጊ ዛሪዳ።

12 ሄሲ ካዎዛ ዪሎቺዴሰኔ ሃንቄላዴሰ፤ ሄሳ ጊሻሰ ባቢሎኔን ዲዛ አቶ ኤራንቻቲ ዉሪካ ሃይቃና ማላ አዛዚዴሰ።

13 አቶ ኤራንቻቲ ሃይቃና ማላ አዋጃይ ኬዚዴሰ፤ ዳኔላኔ ኢዛ ላጌታ ኮዪዲ ዎቆና ማላ ኣሰ ኪቴቲዴሰ።

አጉሞዛኔ ኢዛ ቢርሼል ጸሲ ዳኔላስ ቆንጪሴል

14 ካዎስ ዛቤታ ሃላቃ አርዮኬይ ባቢሎኔን ዲዛ አቶ ኤራንቻታ ዎቆናስ ዪዳ ዎዴ ዳኔሊ ኢዛኮ ሺቂዲ ሂላኒኔ ማልኦ ቃላን ኢዛ ሃሳይሲዴሰ።

* 2:4 አራማይኬ ቃላ ጊዛይሲ አራሜ ዴሬ ቃላ ጊዲሺን ሄ ዎዴ ዳር ኣሲ ሄ ቃላ ኤሪዛ ጊሻሰ ሽም 2:4-7:28 ጋካናስ ዲዛይሲ አራማይኬ ቃላን ጸፊቲዴሰ።

15 ዳኔሊ ካዎ ሹሜዛ፥ «ካዎይ ሃይሳ ዴጾ አዋጃ አይሰ ኬሲዴ?» ጊዲ ኮይቺዴሰ፤ አርዮኬይ ዮኦዛ ዳኔላስ ቆንጨሲ ዮቲዴሰ።

16 ዳኔሊ ሄ ዎዴ ካዎዛኮ ጌሊዲ አጉሞዛ ቢርሻናስ ጉላ ዎዴይ ኢዛስ አሜታና ማላ ዎሲዴሰ።

17 ሄሳፌ ጉዬ ዳኔሊ ባሶ ሲሚ ቢዲ ሄ ሃኒዳ ዮኦዛ ባ ላጌታስ ሃናኒያስ፥ ሚሻኤሌስኔ አዛሪያሳስ ዮቲዴሰ።

18 ኢዚኔ ኢዛ ላጌቲ ሃንኮ አቲዳ ባቢሎኔ ኤራንቻታራ ኢሲፌ ሃይቆንታ ማላ፥ ሳሎ ጾሲ ኢስታስ ማርቴል ዬዳና ማላኔ ሄ ጹራ ዮኦዛ ቆንጨሳና ማላ፥ «ዎሲቲ» ጊዲ ኢስታ ቆፍሲዴሰ።

19 ሄ ጹራ ዮኦይ ዳኔላስ ኦማርሲ አጃታን ቆንጨዴሰ፤ ሄሳ ጊሻስ ኢዚ ሳሎ ጾሳ ጋላቲዴሰ።

20 ዳኔሊ፥ «አጵ ኤራቴሊኔ

ዎልቃይ ኢዛሳ፤

ሄሳ ጊሻስ ጾሳ ሱንሊ

ሜርፔ ሜርናስ አንጄቶ።

21 ኢዚ ዎዴታኔ አገናታካ ላሜሰ፤

ካዎታ አራታን ኡቲሴሰ፤

ካዎቴላ አራታፔካ

ዲጌ ዎሌሰ፤

ኤራንቻታስ አጵ ኤራቴል

አኬኪዛይታሲካ ኤራቴል አሜሰ።

22 ኢዚ ጨማ ጊዲዳ ጹራ ዮኦታኔ

ጌሚዳይታ ቆንጨሴሰ፤

ኡባ ዎዴ ኢዛ ማታን

ፖኦይ ዴሰ፤

ሄሳ ጊሻስ ኢዚ

ጵማን ዲዛዝ ኤሬሰ።

23 ካሴ ታ አዋታ ጎዳዉ!

ታ ኔና ጋላታይሰ፤

ታ ኔና ቦንቻይሰ፤

ኔ ታስ አጵ ኤራቴሊኔ

ዎልቃ አማዳሳ፤

ኑ ዎሳካ ሲያዳሳ፤

ካዎዛ አጉሞዛካ

ኑስ ቆንጨሳዳሳ»

ጊ ጋላቲዴሰ።

አጉሞዛኔ ኢዛ ቢርሼል

24 ሄሳፌ ጉዬ ዳኔሊ ባቢሎኔ ኤራንቻታ ዋዳና ማላ ካዎዛፔ አዛዞይ ኢዛስ አሜቲዳ አርዮኬኮ ቢዲ፡ «ባቢሎኔ ኤራንቻታ ኔ ዋዳፓ፤ ታና ጌዳ ካዎዛኮ ጌልላ፤ ሂስቲኮ ታ ኢዛስ ኢዛ አጉሞዛ ቢርሻና» ጌዴሰ።

25 አርዮኬይ ሄራካ ዳኔላ ጌዳ ካዎ ናቡኬዴናጾሬ ሲንሊ ሺሺዲ፡ «ካዎ! ኔ አጉሞዛ ቢርሸል ነስ ዮታናዴ ዩሁዳ ዴሬፔ ዲኤቲ ዩዳይታ ጌዶፌ ኢሳዴ ዴማዲሰ» ጌ ዮቲዴሰ።

26 ካዎዚካ ቢልጸሶሬ ጌቲቲዳ ዳኔላ፡ «ታ አጉሜቲዳ አጉሞዛ ኢዛ ቢርሸላራ ኔ ታስ ዮታናስ ዳንዲያይ?» ጌ ኦይቺዴሰ።

27 ዳኔሊካ ኢዛስ፡ «ካዎ! ኣይ ኣጵ ኤራንቻቲ፡ ሳጋቲ፡ ማርቲኔ ሙሬኒዛይቲ ኔ ኦይቺዳ ጹራ ዮኦዛ ኔስ ዮታናስ ዳንዳዬቲና።

28 ጌዶ ኣቲን ጹራ ዮኦ ኡባ ቆንጨሲዛ ጸሲ ሳሎን ዴስ፤ ኢዚ ቡሮ ሲንሳፌ ያና ላይላታን ሃናናይሳ ኡባ ኔስ ቆንጨሲዴስ፤ ኔኒ ኔ ሂላን ኢቻ ዳሼ ቤኢዳ አጉሞይኔ ኣጂታይ ሃይሳፌ ካሊዛይሳ።

29 «ካዎ! ኔኒ ኔ ሂላን ኢቻ ዳሼ ሲንሳፌ ሃናና ዮኦታ ቆፓዳሳ፤ ሄ ዋዴ ጹራ ቆንጨሲዛ ጸሳይ ቡሮ ሲንሳፌ ሃናና ዮኦታ ኔና ቤሲዴሰ።

30 ሃይሲ ሃ ጹራ ዮኦዚ ታስ ቆንጨዳይ ታኒ ሃንኮ ኣሳፔ ኣጵ ኤራንቻ ጌዲዳ ጌሻስ ጌዴና፤ ጌዶ ኣቲን ኔኒ ሄ አጉሞዛ ቢርሸል ኤራና ማላኔ ኔ ዎዚና ጌዶን ሲሜሬቲዛ ቆፋ ሻካ ኤራናሳ።

31 «ካዎ! ኔ ሲንላን ኬሂ ጌታ ጸልቂዛኔ ባቢሲዛ ሚስሌይ ኤቂዳይሳ ቤኣዳሳ።

32 ሄ ሚስሌዛ ሁኤይ ጌሻ ዎርቃፌ፡ ኢዛ ቲራይኔ ኢዛ ኩሼቲ ቢራፔ፡ ኢዛ ኡሎይኔ ዎዲራይ ጸርቂማላፔ ኦሴቲዳ፤

33 ኢዛ ሱሌቲካ ቢራታፔ፡ ቶሆ ያቻታፔ ባጋይ ቢራታፔኔ ባጋይ ማና ኡርቃፌ ሜዴቲዴሰ።

34 ኔኒ ሚስሌዛ ጸሊሺን ጌታ ሹቺ ኣሲ ቦቾንታ ባ ዲዛሶፔ ቋቃሌቲዲ ቢራፔኔ ማና ኡርቃፌ ኦሴቲዳ ሚስሌዛ ቶሆታ ሚንፍሬሳ ሊቂሲዴሰ።

35 ሄራካ ቢራታዚ፡ ማና ኡርቃዚ፡ ጸርቂማላዚ፡ ቢራዚኔ ዎርቃዚ ወሪ ሜቂሬቲ ዎዲዳ፤ ቦኔ ካላ ባሌን ዲዛ ሱላ ማላ ጌዲዳ፤ ጫርኮይ ኢስታ ኢሲኖካ ኣሾንታ ፒቲ ኤፌዴስ፤ ሚስሌዛ ቦላ ኩንዲዳ ሹቻዚ ጌዲኮ ኢዚ ቢታ ኩማናሼ ጋካናስ ጌታ ዙማ ጌዲዴሰ።

36 «ሄኮ አጉሞዚ ሃይሳ፤ ኢዛ ቢርሸላይካ ሃይሳፌ ካሊዛይሳ።

37 ካዎ! ኔኒ ካዎታስ ካዎ፤ ሳሎ ጸሲ ኔስ ካዎቴሉ፤ ማታ፤ ዎልቃኔ ቦንቾ አሟደስ።

38 ኢዚ ኔኒ ቢታ ኡባ ሃራና ማላ ኦሊደስ፤ ኢዚ ኔስ አሳ፤ ሜሃ፤ ዶኣታኔ ካፎታ ቦላ ጎዳቴሉ አሟደስ፤ ሄሳ ጊሻስ ዎርቃ ሁኤዚ ኔና።

39 «ኔፔ ጉዬ ኔፔ ሲሚዛ ካዎይ ዴንዳና፤ ኢዛፔካ ካሊዲ ጸርቂማላን ለሚሴቲዳ ሄሻንሶ ካዎይ ዴንዳና፤ ኢዚካ ኩሜላ አላሜ ሃራና።

40 ቃሴካ ቤቲዳ ሚሽ ኡባ ሚንሐሬሉ ዩጊዛ ቢራታ ማላ ሚኖ ጊዲዳ ኦይዳንሶ ካዎይ ካዎታና፤ ቢራታይ ኡባ ሚንሐሬሉ ለቂሲዛ ማላ ኢዚ ባፔ ካሴ ካዎቲዳ ካዎታ ሚንሐሬሉ ዩጋና።

41 ኢዛ ቶሆቲኔ ኢዛ ቶሆ ቢራጼቲ ባጋይ ቢራታፔ ባጋይ ማና ኡርቃፌ ጊዲዳይሳ ኔ ቤኢዳ ማላ ሄ ካዎቴላይ ናምኡ ኬዚ ሻኬቲዳ ካዎቴሉ ጊዳና፤ ቢራታይኔ ኡርቃይ ዋላኬቲዳይሳ ኔ ቤኢዳ ማላ ሄ ካዎቴላፌ ባጋይ ቢራታ ማላ ሚኖ ጊዳና።

42 ኢዛ ቶሆታ ቢራጼታፔ ባጋይ ቢራታ፤ ባጋይ ማና ኡርቃ ጊዲዳ ማላ ሄ ካዎቴላፌ ባጋይ ሚኖ፤ ቃሴ ላፋ ጊዳና።

43 ቢራታይኔ ማና ኡርቃይ ዋላኬቲዳይሳ ማላ አሳይ ኡባይ ዋላካ ጊዳና፤ ጊዶ አቲን ቢራታይ ማና ኡርቃራ ኦይኬቶንታይሳላ ኢስቲካ ባ ጊዶን ኢሲኖ ጊዲ ኦይኬቲቲና።

44 «ሄይታ ሄ ካዎታ ዎዴን ሳሎ ጸሳይ ሙሌራካ ላሌቶንታኔ ሃራ ዴሬስ አጼ አሜቶንታ ካዎቴሉ ኤሳና፤ ሄ ካዎቴላዚ ሃራ ካዎቴላታ ሙሌራ ለቂሳና፤ ኢስታ ዉርሴሉ ጋካናዉካ ጳይሳና፤ ሄ ካዎቴላዚ ባ ሁኤስ ሜርናስ ሚኒ ዳና።

45 ኢሲ ቦቾንታ ዲሽን ዙማ ቦላፌ ቆቃሌቲዲ ቢራታፔ፤ ጸርቂማላፔ፤ ማና ኡርቃፌ፤ ቢራፔኔ ዎርቃፌ ኦሴቲዳ ሚሰሌዛ ለቂሲዳ ሹቻ አጂታ ቢርሼላይ ሃይሳ፤ ጌታ ጸሳይ ቡሮ ሲንላፌ ሃናናይሳ ካዎ ኔና ቤሲደስ፤ አጉሞዚካ ቱማ፤ ኢዛ ቢርሼላዚካ አማንሰዚዛ» ጊ ዮቲደስ።

ካዎዚ ዳኔላስ አሟዳ አዎታ

46 ሄሳፌ ጉዬ ካዎ ናቡካዳናጾሬይ ባ ሁኤ ዱጌ ቢታ ጋሊዲ ዳኔላስ ዘጊደስ፤ ኢዛካ ቦንቹደስ፤ ኢዛስ ያርሾኔ ኤጻኔ ሺሻና ማላ አዛዚደስ።

47 ካዎዚ ዳኔላ፤ «ሃይሳ ጹራ ዮኦዛ ኔ ቢርሻና ዳንዳይዳ ጊሻስ ቱማፔ አንቲ ጸሳይ ጸሳታስ ጸሳ፤ ኢዚ ካዎታስ ጎዳ፤ ኢዚ ጹራ ቆንጨሲዛ ጸሳ» ጊደስ።

48 ሄሳፌ ጉዬ ካዎዚ ዳኔላ ገታ ቦንቾሶን ዋሊደስ፤ ከሄ ዳሮ ኢሞታታ ኢዛስ ኢሚደስ፤ ባቢሎኔ ካዎቴላ ኡባ ኣይሲዛዴ ሂስቲደስ፤ ባቢሎኔ ኤራንቻታ ኡባ ቦላ ሃላቃ ሂስቲ ሹሚደስ።

49 ሄሳፌካ ቦላራ ዳኔሊ ካዎዛ ቆፍሲን ካዎዚ ሲዲራቃ፡ ሚሳቃኔ ኣብዲናጎ ባቢሎኔ ኣዉራጀታ ኡባ ቦላ ኣይሲዛይታ ሂስቲ ሹሚደስ፤ ዳኔሊ ገዲኮ ካዎ ከፋን ኡቲደስ።

3

ናቡካዳናጆሬይ ኤሲዳ ኤቃ ሚሰሌ

1 ካዎ ናቡካዳናጆሬይ ጌሳይ 60 ዋቋ፡ ኅምፓይ 6 ዋቋ ገዲዳ ዋርቃ ሚሰሌ ኦሲሲዲ ባቢሎኔ ዳሬን ዱራ ዴምባን ኤሲደስ።

2 ሄ ኢዚ ኤሲዳ ሚሰሌዛ ኣንጂሳናስ ገታ ኣሳታ፡ ሹሜታ፡ ዳሬ ኣይሲዛይታ፡ ካዎዛ ዞሪዛ ኣሳታ፡ ሚንጃ ከፋ ኣላፊታ፡ ዳናታ፡ ዋጋ ኤሪዛይታኔ ሃራ ዱማ ዱማ ኣዉራጀን ዲዛ ሹሜታ ዴይጊሲደስ።

3 ሄይቲ ዳሬ ኣይሲዛይቲ ዉሪካ ሄ ሚሰሌዛ ኣንጂሳናስ ኢሲፌ ሸቂዲ ሄ ሚሰሌዛ ሲንፋን ኤቂዳ።

4 ሄ ዋዴ ኣዋጃ ኣዋጂዛ ኢሳዴይ ባ ቃላ ቅቂ ሂስቲዲ፡ «ኢንቴኖ ዱማ ዱማ ዳሬፔ፡ ዱማ ዱማ ካዎቴላፌኔ ዱማ ዱማ ቃላን ሃሳይዛሶፔ ዪዳይቶ!

5 ዛዬኔ ዲንኬ ጌሪስ፡ ማሲንቆኔ ዲላ ጌሪስ፡ ሱሱልኤ ባጋና ጌሪስ፡ ቃሴካ ዬላ ጌሪስ ኡባ ሲዪዳ ማላ ዲጌ ቢታን ጉፋኒዲ ካዎ ናቡካዳናጆሬይ ኤሲዳ ዋርቃ ሚሰሌዛስ ጎይናና ቤሴስ።

6 ቢታን ጉፋኒዲ ጎይናንታይ ኦኒካ ዲኮ ላጪዛ ኢቶኔ ታማን ዬጌታና» ገ ኣዋጂደስ።

7 ሄሳ ገሻስ ዱማ ዱማ ዳሬፔ፡ ዱማ ዱማ ካዎቴላፌኔ ዱማ ዱማ ቃላን ሃሳይዛሶፔ ዪዳ ኣሳቲ ኡባይ ዲንኬ ጌሪስ፡ ማሲንቆኔ ዲላ ጌሪስ፡ ባጋናና ሱሱልኤ ጌሪሲኔ ዬላ ጌሪስ ሲዪዳ ማላ ቢታን ጉፋኒዲ ካዎ ናቡካዳናጆሬይ ኤሲዳ ዋርቃ ሚሰሌዛስ ጎይናና።

ዋርቃ ሚሰሌዛስ ጎይናንታ ኢጲዳ ሄቫታ

8 ሄ ዋዴ ጸለንቲ ፒልጊዛ ኢሲ ኢሲ ባቢሎኔ ኤራንቻቲ ሸቂዲ ኣይሁዳታ ሞቲዳ።

9 ካዎ ናቡካዳናጆሬስካ፡ «ካዎ! ኔኒ ሜርናስ ካዎታ!

10 ካዎ! ኔኒ፡ ሐዬ፡ ዲንኬ፡ ማሲንቆ፡ ዲላ፡ ባጋና፡ ሱሱልኤኔ ዬላ ጌሪስ ሲዪዳይ ኦኒካ ቢታ ቦላ ጉፋኒዲ ዋርቃ ሚሰሌዛስ ጎይናናና ቤሴስ።

11 ቢታን ጉፋኒዲ ሚሰሌዛሰ ጎይኖንታዴይ ዲኮ ላጪዛ ኢቶኔ ታማን ዩጌቶ» ጋ አዋጃዳሳ።

12 ሄኮ ኔኒ ባቢሎኔ አዉራጃታ አይሳና ማላ ሹሚዳ ሲዲራቁ፥ ሚሳቁኔ አብዲናጎ ጌቴቲዛ አይሁዳ አሳቲ ኔ አዛዙ ፖሌቴና፤ ኔ ኤቃ ጸሳታሰ ሃጋዜቴና፤ ኔ ኤሲዳ ዋርቃ ሚሰሌዛሰ ጎይኔቴና» ገ ዮቲዳ።

13 ካዎዚ ሄሳ ሲዱዲ ኬሂ ሃንቁቲዲ ሲዲራቃ፥ ሚሳቃኔ አብዲናጎ ጸይጋና ማላ አዛዚዴሰ፤ ኢሰቲካ ኤሂዲ ካዎዛ ሲንላ ሺሺዳ።

14 ካዎ ናቡካዳናጸሬይ፥ «ሃይቶ ሲዲራቃ፥ ሚሳቃ፥ አብዲናጎ! ኢንቴ ታ ኤሲዳ ዋርቃ ሚሰሌዛሰ ጎይኖንታ ኢዲዳይሲኔ ታ ኤቃ ጸሳታሰ ሃጋዘንታ ኢዲዳይሲ ቱሜ?»

15 ሃኢካ ዛዬ፥ ዲንኬ፥ ማሲንቆኔ ዲላ፥ ባጋናኔ ሱሱልኤ፥ ዬላ ገሪሰ ኡባ ኢንቴ ሲዱዲ ታ ኤሲዳ ሚሰሌዛ ሲንላን ቢታ ቦላ ጉፋኒዲ ኢንቴ ጎይኒኮ ኢንቴሰ ኪያ ገዳና፤ ኢንቴ ጎይኖንታ ኢዲኮ ሄ ላጪዛ ኢቶኔ ታማን ሄራካ ዩጌታና፤ ኢንቴና ታ ኩሼፔ አሻና ጸሲ ኢንቴሰ ባይንዳይሳ ኢንቴ ኤሪቴ!» ገዴሰ።

16 ሲዲራቁ፥ ሚሳቁኔ አብዲናጎይ ካዎዛሰ፥ «ካዎ! ሃይሳ ሃ ዮኦዛሰ ገዲ ኑ ገሻሰ ኔሰ ዛሮ ኢማና ቤሰና።

17 ካዎ! ኑሂ ሃይሳ ላጪዛ ኢቶኔ ታማን ዩጌቲዛ ገዲኮካ ኑሂ ኢዛሰ ጎይኒዛ ጸሳይ ሃይሳ ላጪዛ ኢቶኔ ታማፔኔ ኔ ኩሼፔ ኢዚ ኑና አሻና ዳንዳዬሰ።

18 ገዶ አቲን ካዎ! ኢዚ ኑና አሸንታ አገኮካ ኑሂ ኔ ኤቃ ጸሳታሰ ሃጋዘንታይሳኔ ኔ ኤሲዳ ዋርቃ ሚሰሌዛሰ ኑ ጎይኖንታይሳ ኔ ኤራ» ገ ዛሪዳ።

ዳኔላ ላጌ ሄቫታ ቦላ ፒርዴቲዳ ፒርዳ

19 ሄ ዋዴ ናቡካዳናጸሬይ ሲዲራቃ ቦላ፥ ሚሳቃ ቦላኔ አብዲናጎ ቦላ ኬሂ ሃንቁቲን ኢዛ ሜቆይካ ላማቲ ዋቋዴሰ፤ ላጪዛ ኢቶኔ ታማዚ ካሴፔ ላፑን ኩሼ ዳሪ ኤጻና ማላ አዛዚዴሰ።

20 ሄ ሄቩ አሳታ ቃቺዲ ላጪዛ ኢቶኔ ታማን ዩጋና ማላ ባ ኦላ አሳ ገዶፌ አማርዳ ሚኖ አሳታ አዛዚዴሰ።

21 ሄሳ ገሻሰ ኢሰቲ ሴሎ ማይኦዛ፥ ሱሬዛ፥ ሁኤን ጸጺዛይሳኔ ሃራ ማይኦታካ ማይኢዳ ማላ ቃሼቲዲ ላጪዛ ኢቶኔ ታማን ዩጌቲዳ።

22 ካዎዚ ኢሚዳ ሚኖ አዛዞዛ ኢቶኔ ታማዚ ኬሂ ኤጲዛ ገሻሰ ሲዲራቃ፥ ሚሳቃኔ አብዲናጎ ታማን ዩጊዳ ኦላ አሳታ ሄ ታማ ሴላይ ዋጲዳሰ።

23 ሄ ሄዡ አሳቲ ጊዲኮ ኢስቲ ሚንሉ ቃቺን ላጪዛ ኢቶኔ ታማን ዩጌቲዳ።

24 ሄሳፌ ጉዬ ካዎ ናቡካዳናጾሬይ ባ ኡቲዳሶሆፕ ማላሌቲሼ ዳንዲ ኤቂዲ፥ «ኮኒ ቃቺዲ ኤጲዛ ኢቶኔ ታማን ዩጊዳ አሳቲ ሄዡታ ጸላ ጊዳቴኔ?» ጊዲ ባና ዘሪዛይታ ኦይቺዳሰ፤ ኢስቲካ፥ «ካዎ! ኤ ሄዡታ!» ጊዳ።

25 ካዎዚካ፥ «ሄኮ ሃኢ ታኒ ኢስታ ታማዚ አይኮካ ቦቾንታ ቃሾፕ ቢርሼቲዲ ላጪዛ ኢቶኔ ታማ ጊደን ሄ ሃ ሲሜሬቲዛ ኦይዲ አሳታ ቤአይሰ፤ ኦይዳንፉዚካ ጸሳታ ና ሚሳቴሰ» ጊዳሰ።

ኢቶኔ ታማፕ ኣቲዳ ሄዡታ ሹሜቴላ

26 ሄሳ ገሻሰ ናቡካዳናጾሬይ ሄ ኤጲዛ ኢቶኔ ታማኮ ሸቂ ባ ቃላ ቶቁ ሂስቲዲ፥ «ኢንቴኖ ኡባፌ ቶቃ ጸሳ ኦሳንቻቶ! ሲዲራቃ፥ ሚሳቃ፥ አብዲናጎ! ኬዚዲ ሃ ዩቴ!» ጊዲ ዴይጊዳሰ፤ ኢስቲካ ታማዛ ጊደፌ ኬዚዳ።

27 ሄሳፌ ጉዬ ጌታ አሳቲ፥ ሹሜቲ፥ ዴሬ አይሲዛይቲ፥ ካዎዛ ዘሪዛይቲ ዉሪ ሄ ኢስታ ዩሾን ሸቂዳ፤ ታማይ ኢስታ አሳቴላ ቆሆንታይሳ፥ ሁኤ ቢናናፕ ኢሲኔያካ ቦሹቶንታይሳ፥ ኢስታ ሴሎ ማይኦዚ ሜፉ ላሞንታይሳኔ ጨዋ ጨዋ ጎንታይሳ ቤኢዳ።

28 ሄሳፌ ጉዬ ታኒ ካዎ ናቡካዳናጾሬይ፥ «ኢዚ ባ ኪታንቻ ከቲዲ ባ ኦሳንቻታ አሺዳ ሲዲራቃ፥ ሚሳቃኔ አብዲናጎ ጸሳይ ጋላቴቶ! ኢስቲካ ባ ጎዳን አማኔቲዲ ባ ጸሳሰ ኣቲን ሃራ ኤቃ ጸሳታሰ ኦሶኮኔ ጎይኖኮ ጊዲ ካዎዛ አዛዞ ኢጲዲ ባ ሽሞፖ ኣሉ ኢሚዳ።

29 «ሃይሳ ማላ አሺዛ ሃራ ጸሲ ዴና፤ ሄሳ ገሻሰ ዲማ ዲማ ዴሬይ፥ ዲማ ዲማ ካዎቴሉ ዋይኮ ዲማ ዲማ ቃላን ሃሳይዛ አይ ኣሲካ ሲዲራቃ፥ ሚሳቃኔ አብዲናጎ ጸሳ ቦላ ጫሻ ቃላን ሃሳይኮ ሃሳይይ ሹኬቶ፤ ኢዛዳ ኬላይ ላሌቲ ዶሬቶ» ጋ አዛዛዲሰ።

30 ሄሳፌ ጉዬ ካዎዚ ሲዲራቃ፥ ሚሳቃኔ አብዲናጎ ባቢሎኔ አዉራጃታን ሹሚዳሰ።

4

ናቡካዳናጾሬይ ቤኢዳ ናሞኣንሶ አጉሞ

1 ካዎ ናቡካደናጾሬይ አላሜ ቦላ ዱማ ዱማ ዳሬታስ፥ ዱማ ዱማ ካዎቴላታሲኔ ዱማ ዱማ ቃላን ሃሳይዛ አሳታስ ኡባስ፥ ሳሮይ ኢንቴስ ጊዶ!

2 ኡባፌ ቶቃ ጸሳይ
ታስ ኦሊዳ
ጊታኔ ማላሊሲዛ ኦሶታ
ታ ኢንቴስ ኮታናስ ኮያይስ።

3 ጸሲ ቤሲዛ ማላታይ
ኣይ ማላ ጊታ!
ማላሊሲዛ ኢዛ ኦሶቲ
ኣይ ማላ ሚኖ!
ጸሲ ሜርናስ ካዎ፤
ኢዛ ካዎቴላይ ዬሌታፔ
ዬሌታ ጋካናስ ዴኤስ።

4 ታኒ ናቡካደናጾሬይ ታ ኬላን ታስ ኢንጃን ታ ካዎቴላንካ ኢሻሎን ዳይስ።

5 ጊዶ ኣቲን ጋላሳታፔ ኢሲ ጋላስ ታኒ ታ ሂላን ኢቻ ዳሼ ዳሮ ዳጋንሊዛ ኣጉሞኔ ኣጂታ ቤያዲስ።

6 ሄሳ ጊሻስ ሄ ኣጉሞዛ ቢርሼል ታስ ኮታና ማላ ባቢሎኔን ዲዛ ኤራንቻቲ ዉሪ ታኮ ያና ማላ ኣዛዛዲስ።

7 ቢቲዛይቲ፥ ማሮቲ፥ ሳጋቲ፥ ጸሊንቴ ታይቢዛ ኤራንቻቲኔ ሙሬኒዛይቲ ኡባይ ታኮ ዪን ታ ኢስታስ ታ ኣጉሞዛ ኮታዲስ ሺን ኢስቲ ኣጉሞዛ ቢርሻና ዳንዳይቤቴና።

8 ሄሳፌ ጉዬ ታ ጸሳ ሱንላን ቢልጸሶሬ ጌቴቲ ጸይጌቲዛይሲኔ ጌሻ ጸሳታ ኣያናይ ኢዛን ዲዛ ዳኔሊ ጌሊዲ ታ ሲንላን ኤቂን ታ ኣጉሞዛ ኢዛስ ኮታዲስ።

9 ታኒካ፥ «ኤራንቻታስ ሃላቃ ጊዲዳ ቢልጸሶሬ! ጌሻ ጸሳታ ኣያናይ ኔናን ዲዛይሳኔ ጹራ ኮኦይ ዉሪካ ኔፔ ጌሞንታይሳ ታ ኤራይስ፤ ሄሳ ጊሻስ ታኒ ቤኢዳ ኣጉሞዛ ኔ ታስ ቢርሻ።

10 «ታኒ ታ ሂላን ኢቻ ዳሼ ኢሲ ዋጋ ጊታ ሚሊ ዳይሲ ቢታ ቦላ ኤቂዳይሳ ኣጂታን ቤያዲስ።

11 ሄሲ ሄ ሚላዚ ኬሂ ዲጨዴስ፤ ሚኒዴስ፤ ኢዛ ጸራይካ ሳሎ ጋኪዴስ፤ ሳኣ ጋጸ ጋካናስ ቤቲዴስ።

12 ኢዛ ሃይላይ ጨሊላ፤ ኢዛ ኣይፌይ ዳሬ ኡባስ ጊዳና ጋካናስ ዳሪዴስ፤ ኢዛ ኩዋይ ዶኣታስ ሽምፒዛሶ ጊዲዴስ፤ ሳሎ

ካፎቲካ እዛ ሃጋታ ቦላ ባ ከላ ከጸዲ እዛን ዴቲስ፤ ሽምፖራ ዲዛ ሜዴቲላቲ ዉሪካ ሄ ሚላዛ አይፌ ሜቲስ።

13 «ታኒ ታ ሂላን ኢቻ ዳሼ አጂታን ኢሲ ጌሻ ኪታንቻይ ሳሎፔ ዲጌ ዋዲሺን ቤአዲስ።

14 ኢዚካ ባ ቃላ ጾቁ ሂስቲዲ፡ ሳይሳ ሚላዛ ቃንጸቲ፤ እዛ ሃጋታ ኡባ ጉሪቲ፤ እዛ ሃይላ ኡባ ዩዲቲ፤ እዛ አይፌዛ ላሊቲ፤ እዛ ኩዋ ጋርሳን ዲዛ ዶኣቲኔ እዛ ሃጋታ ቦላ ዲዛ ካፎቲ ባቃቲቶ።

15 ጊዶ አቲን እዛ ዱሩማዛኔ ጸጸዛ ቢራታፔኔ ጸርቂማላፔ ኦሴቲዳ ሳንሳላታን ዩሺ ቃቺዲ ሄን ዴምባን ማታ ጊዶን ቢታ ጋርሳን አጋጊቲ፤

ኢዚ ሳሎፔ ዋዲዛ ኬንቾን ሙሶ!

ኢዚ ዶኣታራ ቱሻ ጊዶን ዴኦ።

16 እዛ ካሃይ አሳይሳፌ ላሜቶ፤ ላፑን ላይላ ጋካናስ እዛስ ሜሄ ካሃይ እሜቶ።

17 « ሳ ፒርዳ ቃሾይ ጌሻ ኪታንቻታ ባጋራ ቆንጪ ዮቲቲዴስ፤ ሄሲካ ኡባፌ ጾቃ ጸሳስ ሳኦ ካዎታ ቦላ ኢዛስ ጎዳቲላ ዲዛይሳኔ ካዎቲላታካ ባ ዶሲዳዴስ እሚዛይሳ፡ አሳፔ ካዴቲዳይታ ኢስታ ቦላ ኢዚ ሹሚዛይሳ፡ ሜዴታ ኡባይ ኤራና ማላሳ» ጊዴስ።

18 «ታኒ ካዎ ናቡካዳናጾሪይ ቤኢዳ አጉሞይ ሃይሳ፤ ቢልጸሶፊ! ኔኒ ታስ አጉሞዛ ቢርሻ፤ ታ ካዎቲላን ዲዛ ኤራንቻቲ ቢርሼላ ታስ ዮታናስ ዳንዳይቤቲና፤ ኔ ጊዲኮ ጌሻ ጸሳታ አያናይ ኔናን ዲዛ ጊሻስ ታስ ቢርሼላ ዮታና ዳንዳያሳ» ጊዴስ።

ካዎ አጉሞ ቢርሼላ

19 ሄ ዋዴ ቢልጸሶፊ ጌቲቲዛ ዳኔሊ ኬሂ ዳጋሚዲ ሃኒዛዝ ዳይዴስ፤ ባ ቆፋን ጉላ ዋዴስ ጨፎጨዴስ፤ ካዎዚካ እዛ፡ «ቢልጸሶፊ! አጉሞዛ ጊዲን ዋይኮ እዛ ቢርሼላይ ኔና ዳጋንሰፎ» ጊዴስ።

ቢልጸሶፊካ እዛስ፡ «ካዎ! ኔ አጉሞዚ ኔና ኢጸዛይታስ፡ ቢርሼላይካ ኔ ሞርኬታስ ጊዶ።

20 ኬሂ ዲጪ ሚኒን ኔ ቤኢዳ ሚላዚ ጸራይካ እዛስ ሳሎ ጋኪን ቢታ ኡባን ቤቲዛ ሚላዚ፡

21 እዛ ሃይላቲ ጨሊሊዲይ፡ እዛ አይፌይ ዴሬ ኡባስ ጊዳና ጋካናስ ዳሪዳይ፡ ዶኣቲካ እዛ ኩዋ ጋርሳን ሽምፒዳይ፡ ካፎቲካ እዛ ሃጋታ ቦላ ባስ ከላ ከጸዲ ዴኢዲይ፡

22 «ካዎ! ሄ ሚላይ ኔና፤ ኔ ጌታቲላይ ዲጪዲ ሳሎ ጋኪዴስ፤ ኔ ካዎቲላይካ ቢታ ጋጸ ጋኪዴስ።

23 «ካዎዞ! ኔ ቤኢዳ ጌሻ ኪታንቻይ ሳሎፔ ዎዲዲ፡ ሲንቴ ሚላዛ ቃንጺ ጳይሲቲ፤ ኣቲዳ ዲሩማዛኔ ጸጸዛ ቢራታፔኔ ጸርቂማላፔ ኦሴቲዳ ሳንሳላታን ዩሺ ቃቺዲ ዴምባን ማታ ጊደን ቢታ ጋርሳን ኣጋጊቲ፤ ሄን ሳሎ ኬንቸን ሙሶ፤ ላቸን ላይሊ ኢዚ ዶኣታራ ዴኦ» ጊዛይሳ ሲያዳሳ።

24 «ካዎ! ሄኮ ቢርሼላይ ሃይሳ፤ ኡባፌ ቶቃ ጸሳይ ታ ጎዳ ካዎዞ ቦላ ፖሌታና ማላ ኬሲዳ ኣዎጃይ ሃይሳፌ ካሊዛይሳ።

25 ኔኒ ኔ ዴሬዛፔ ሻኬታዳ ጎዴታና፤ ኔሰ ዲሳሶይካ ዎራ ዶኣታራ ጊደና፤ ላቸን ላይሊ ፖሌታና ጋካናሰ ኔኒ ሜሄ ማላ ማታ ማና፤ ኔኒ ኬንቸን ሙሳና፤ ሄሲ ወሪ ኔና ጋካናይ ኡባፌ ቶቃ ጸሳይ ካዎታ ኡባ ቦላ ኢዛሰ ጎዳቲሊ ዲዛይሳኔ ኢዚ ካዎቲላ ወርሲካ ባ ዶሲዳዴሰ ኢሚዛይሳ ኔ ሻካ ኤራና ጋካናሳ።

26 ዲሩማዚ ጸጸዛራ ሄን ጋዴ ጊደን ኣታና ማላ ኢዚ ኣዛዚዲይ ጸሳሰ ኣላሜ ቦላ ኩሜላ ማታይ ዲዛይሳ ኔ ኤራዳ ኔኒ ሰማ ኔ ካዎቲላን ኡታናይሳ ቤሴሰ።

27 ሄሳ ጊሻሰ ካዎ! ታኒ ታ ባጋራ ኔና ዞሪዛይሳ ሲያ፤ ኔኒ ናጋራ ኦሶ ኣጋ፤ ሱሬ ኦሶ ኡባ ዎዴ ኦላ፤ ኔ ኢታ ኦሶ ኣጋዳ ቆሄቲዛይታሰ ቃዴታ፤ ሄሳሶ ኔ ኦሊኮ ኔ ሳሮን ዲሳ ላይላይ ኣዲቆንታ ኣጌና» ጊዴሰ።

ኣጉሞዛ ፖሌቲላ

28 ሄሲ ወሪካ ካዎ ናቡካዳናጾሬ ቦላ ጋኪዴሰ።

29 ታማኔ ናሞኡ ኣገናፔ ጉዬ ኢዚ ባቢሎኔን ካዎቲላ ኬላ ፖቄ ቦላ ሲሜሬቲሹ፤

30 «ታ ሚና ዎልቃን ታ ቦንቸሰ ካዎሰ ዲሳሶ ጊደና ማላ ታ ኦሲሲዳ ጊታ ባቢሎኔ ካታማያ ሃኖ ጊዴኬ?» ጊዴሰ።

31 ኢዚ ቡሮ ሃሳያ ባ ዶናፔ ኬሲ ወርሶንታ ዲሺን ሳሎፔ፡ «ካዎ ናቡካዳናጾሬ! ኔ ቦላ ፒርዴቲዳ ፒርዳይ ሃይሳፌ ካሊዛይሳ። ሄኮ ኔ ካዎቲላይ ኔፔ ኤኬቲዴሰ።

32 ኔኒ ዴሬዛ ጋርሳፌ ጎዴታና፤ ኔሰ ዲሳሶይ ዎራ ዶኣታራ ጊደና፤ ላቸን ላይሊ ኩማና ጋካናሰ ኔኒ ሜሄ ማላ ማታ ማና፤ ሄሲካ ሃናናይ ኡባፌ ቶቃ ጸሳይ ካዎታ ኡባ ቦላ ኢዛሰ ጎዳቲሊ ዲዛይሳኔ ካዎቲሊ ወርሲካ ኢዚ ባ ዶሲዳዴሰ ኢሚዛይሳ ኔ ሻካ ኤራና ጋካናሳ» ጊዛ ቃላይ ዪዴሰ።

33 ሄ ቃላይ ሄራካ ካዎ ናቡካዳናጾሬ ቦላ ፖሌቲዴሰ፤ ሄሳ ጊሻሰ ኢዚ ዴሬዛ ጋርሳፌ ጎዴቲዴሰ፤ ሜሄ ማላ ማታ ሚዴሰ፤

ሳሎፔ ዎጂዛ ኬንቸን ኢዚ ሙሲዴስ፤ ኢዛ ቢናናይካ ጎሌ ካፎ ባሌ ማላ ዲጪዴስ፤ ኢዛ ጹጉንፊካ ካፎ ጹጉንፋ ማላ ጊዲዴስ።

ካዎ ናቡካዳናጆሬስ ዎዚና ካሃይ ሲሚን ጸሳ ጋላቲዴስ

³⁴ ካዎ ናቡካዳናጆሬይ፥ «ላፑን ላይላቲ አጂዳፔ ጉዬ ታኒ ታ አይፌታ ፑዴ ሳሎ ዴንፋዲስ፤ ታስ ዎዚና ካሃይ ሲሚዴስ፤ ኡባፌ ጶቃ ጸሳ ጋላታዲስ፤ ሜርናስ ዲዛ ጸሳ ሳባዲስ፤ ቦንቸካ ኢዛስ ኢማዲስ፤

ኢዛ ካዎቴላይ ሜርናሳ፤
ኢዛ ካዎቴላይ ዬሌታፔ
ዬሌታ ጋካናስ ዳና።

³⁵ ቢታ ቦላ ዲዛ ዴሬቲ ወሪካ
ኢዛ አቻን ቄሪ ኡኤ ማላ፤
ሳሎን ዲዛ ኦሳንቻታ ቦላኔ
ቢታ ቦላ ዲዛ ዴራ ቦላ
ኢዚ ባ ዶሲዳዝ ኦፊስ፤
ኢዛ ሼኔ ዲጋናስ
ዳንዳይዛይኔ
ኒኔ ሃይሳ አዛስ ኦላይ?፤
ጋናይ ኦኒካ ዴና።

³⁶ «ታ ዎዚና ካሃይ ታኮ ሲሚን ሄራካ ታ ካዎቴላስ ቦንቸይ፥ አዮቴሊኔ ቴማይ ሲሚዴስ፤ ካሴ ታና ዞሪዛይቲኔ ታ ሹማቲ ታና ኡፋይሳን ሞኪ ኤኪዳ፤ ካሴ ታኒ ካዎቴላ አራታን ሲማ ኡታዲስ፤ ካሴይሳፌ ቦላራ አጽ ቦንቹታዲስ።

³⁷ «ሄኮ ቤኢቲ! ታኒ ናቡካዳናጆሬይ ሳሎ ካዎስ ጋላታ፥ ቦንቹኔ ሳባ ሺሻይስ፤ ኢዛ ኦሶ ኡባይ ሊኬ፤ ኢዛ ኦጌይካ ሱሬ፤ ኦቶራንቻታ ኢዚ ካዉሻናስ ዳንዳዬስ» ጊዴስ።

5

ቤለሻጆሬይ ገግሲዳ ገቢራ

¹ ጋላሳታፔ ኢሲ ጋላስ ካዎ ቤለሻጆሬይ ሺያን ቆዴቲዛ ገታ ሹማታስ ኬሂ ገታ ገቢራ ገግሲዴስ፤ ኢዚ አሳራ ዎይኔ ኡሹ ኡዪሹ ቃሚሲዴስ።

² አሳይ ዎይኔ ኡሻ ኡዪሺን ቤለሻጆሬይ ካሴ ኢዛ አዎ ናቡካዳናጆሬይ ዬራሳላሚን ዲዛ ጸሳ ኬላፌ ቦንቂ ኤኪዳ ዎርቃፌኔ ቢራፔ ኦሴቲዳ ጽኣታ ኤሃና ማላ ባ ኦሳንቻታ

አዛዚዳስ፤ ካዎዚ ሄሳ ኦሊዳይ ኢዚኔ ኢዛ ሹማቲ፥ ኢዛ ማቼቲኔ ኢዛ ላጌሶቲ ሄ ጹኣታን ዎይኔ ኡሹ ኡያና ኮዪዳ ገሻሳ።

³ ኢዛ ኦሳንቻቲካ ሄ ዬሩሳላሜ፤ ጸሳ ኬላፌ ቢዳ ዋርቃፌኔ ቢራፔ ኦሴቲዳ ጹኣታ ሄራካ ኤሂዳ፤ ካዎዚኔ ኢዛ ሹማቲ፥ ኢዛ ማቼቲኔ ኢዛ ላጌሶቲ ሃይታ ሃ ጹኣታን ኡዪዳ።

⁴ ኡሻ ኡዪሹ ዋርቃፌ፥ ቢራፔ፥ ጸርቂማላፔ፥ ቢራታፔ፥ ሚላፌኔ ሹቻፌ ኦሴቲዳ ኤቃ ጸሳታ ጋላቲዳ።

⁵ ቆፖንታ ዲሺን አሳ ኩሺ ቢራዴቲ ቤቲዲ ጸሳ ኬላን ጸምፔ ዋሊዛሶፔ ሲንሳ ባጋራ ሜሺቲ ዲዛ ካዎ ኬላን ጎዳ ቦላ ጸፎ ኦይኪዳ፤ ሄ ቢራዴቲ ጸፊሺን ካዎዚ ቤዪዳስ።

⁶ ሄ ዎዴ ካዎዚ ኬሂ ዳጋሚዳስ፤ ኢዛ አይፊሶይ ላሜቲዳስ፤ ኢዛ ኩሺቲኔ ቶሆፔ ዶጪዳ፤ ኢዛ ጋዴይ ኮኮሪዳስ።

⁷ ካዎዚ ሳጋታ፥ ማርታኔ ጸሊንቴ ቆዲዛይታ ባኮ ጌልላና ማላ አዛዚዳስ። ኢስቲካ ጸይጌቲ ዪን ካዎዚ ባቢሎኔ ኤራንቻታስ፥ «ሃይሳ ጸፊቲዳ ቃላ ናባቢዲ ኢዛ ቢርሼላ ታስ ዮታና ዳንዳይዛዳይ ኦኒካ፥ ኦቻ ቴራ ሚሳቲዛ ሴሎ ማይኦ ማይኦና፤ ዋርቃፌ ኦሴቲዳ ጌጾ ቆጴን አላና፤ ኢዛዳይ ታ ካዎቴላንካ ሄቫንሶ ማራን ሹማታና» ገዳስ።

⁸ አጼ ኤራንቻቲ ካዎዛኮ ሺቂዳ ሺን ሄ ጸፊቲዳይሳ ናባባናሲኔ ኢዛ ቢርሼላ ካዎዛ ኤሪሳናስ ዳንዳይዳይ ኦኒካ ኢስታ ጊዶፌ ቤቲቤና።

⁹ ካዎ ቤሊሻጸሬይ ካሴፔ ኬሂ ባቢዳ ገሻስ ኢዛ አይፊሶይ ላሜቲ ላሜቲ ቢዳስ፤ ኢዛ ሹማታስ ሃኒዛዚ ጳዪን ዳጋሚዳ።

¹⁰ ጎዳቴያ ካዎዛ ጨንጉርሲኔ ሹማታ ቃላ ሲያዳ ጊቢራይ ኢዛን ዲዛ ኬላ ጌላዳ፥ «ካዎ! ኔኒ ሜርናስ ካዎታ! ዳጋሞፋ፤ ኔ አይፊሶይ ላሜቶፎ።

¹¹ ጌሻ ጸሳታ አያናራ ዲዛ ኢሳዳይ ኔ ካዎቴላ ጊዶን ዳስ፤ ሄሳዳይካ ካሴ ኔ አዋይ ካዎቴላን ዲሺን ኢዛስ ጸሳታ ማላ አጼ ኤራቴሊ፥ ኤራቴሊኔ አኬካይ ኢዛን ኩሚዳዴ ጊዲ ቤቲዳስ፤ ሄሳ ገሻስ ካሴ ኔ አዋይ ካዎ ናቡካዳናጸሬይ ኢዛ ማርታስ፥ ሳጋታስ፥ ሙራኒዛይታሲኔ ጸሊንቴ ታይቢዛይታስ ኡባታስ ሃላቃ ኦሊ ሹሚዳስ።

¹² ኢዚ አጉሞኔ ማሌሶ ቢርሻናሲ፥ ቆቴቲዳ ጹራ ዮኦታካ ቆንጪሳናስ ሎኦ አያናይ፥ ኤራይኔ አኬካይ ዳስ፤ ሄሳ ገሻስ ካሴ ኔ አዋ ናቡካዳናጸሬይ ኢዛ፥ (ቢልጸሶፊ) ጊ ሱንሊዳ ዳኔላ ኔ

ጴይጊሳ ኤሂሲኮ ኢዚ ሃይሳ ጸፊቶይሳ ቢርሺዲ ኔስ ዮታና»
ጋዲሰ።

ዳኔሊ ካዋዛስ ጹራ ዮኦዛ ቆንጨሴል

13 ሄ ዋዴ ሄራካ ዳኔሊ ካዋዛ ሲንል ሺሺዳ፤ ካዋዚካ ኢዛ፤
«ታ ኣዋይ ካዋ ናቡካዳናጸሬይ ዩሁዳ ዳሬፔ ዲኢ ኤሂዳይታፔ
ዳኔሊ ጌቲቲዛይሲ ኔኔ?

14 ኔ ቦላ ጌሻ ጸሳታ ኣያናይ ዲዛይሳኔ ኔስ ኤራቴሉ፤ ኣከካይኔ
ኣቶ ኤራቴሉ ዲዛይሳ ታኒ ሲያዲሰ።

15 ኣቶ ኤራንቻቲኔ ሳጋቲ ኡባይ ሃይሳ ጸፊቲዳይሳ ናባቢዲ
ቢርሻና ማላ ታ ሲንሉ ሸቂዳ፤ ኢስቲ ጊዲኮ ኢዛ ቢርሼላ ታና
ኤሪሳናስ ዳንዳይቤቴና።

16 ኔኒ ጊዲኮ ጹራ ዮኦታ ቢርሻናሲኔ ዋዪሲዛ ሚሻታ ዉርሳ
ቆንጨሳናስ ዳንዳይዛይሳ ታ ሲያዲሰ፤ ሄሳ ጌሻስ ኔኒ ሃይሳ
ጸፊቲዳይሳ ናባባዳ ታስ ቢርሻ ዮቲኮ ኢስቲ ኔና ኦቻ ቴራ ሚሳቲዛ
ሴሎ ማይኔ ማይዛና፤ ዋርቃፌ ኦሴቲዳ ዋጋ ኔ ቆጴን ኣላና፤ ታ
ካዋቴላንካ ሄዳንሉ ማራን ታ ኔና ሹማና» ጊዳስ።

17 ዳኔሊካ ኢዛስ፤ «ካዋ! ኔ ታስ ኢማና ኢዋታይ ኔስ ጊዶ፤ ኔ
ታስ ኢማናይሳካ ሃራስ ኢማ፤ ታኒ ጊዲኮ ሄ ጸፊቲዳይሳ ናባባዳ
ቢርሼላ ኔስ ዮታና።

18 «ካዋ! ኡባፌ ቶቃ ጸሳይ ካሴ ኔ ኣዋ ናቡካዳናጸሬስ
ካዋቴሉኔ ጊታቴል፤ ቦንቾኔ ቴማቴል ኢሚዳስ።

19 ኢዚ ኢሚዳ ጊታቴላፌኔ ማታፔ ዴንዲዳይሳን ዲማ ዲማ
ዳሬቲ፤ ዲማ ዲማ ካዋቴላቲ፤ ዲማ ዲማ ቃላን ሃሳይዛይቲ ኡባይ
ኢዛስ ኮኮሪዳኔ ያዪዳ። ኢዚካ ባ ዋቋና ኮዪዳይሳ ዋቋስ፤ ኣሻና
ኮዪዳዴ ኣሼስ፤ ባ ቶቂሳና ኮዪዳይሳ ቶቂሴስ፤ ካዉሻና ኮዪዳዴ
ካዉሼስ።

20 ጊዶ ኣቲን ኢዚ ኦቶሬቲዳ ዋዴኔ ኢዛ ዋዚናይ ሙሚዳ
ዋዴ፤ ባ ካዋቴላ ኣራታፔ ዋቋዴስ፤ ቦንቾይካ ኢዛፔ ቃሬቲዳስ።

21 ኢዚካ ዳሬ ጊዶፌ ጎዴቲዳስ፤ ኢዛ ካሃይካ ላማቲዲ ኢዛስ
ሚሄ ካሃይ ኢማቲዳስ፤ ኢዚ ሚሄ ማላ ማታ ሚሼ ሃርዲዳታራ
ዴኢዳስ፤ ኣቂዛሶይ ቆዪን ኢዛ ቦላይ ጸዛን ሙሲዳስ፤ ሄሲ ሄሳላ
ሃኒዳይ ኡባፌ ቶቃ ጸሳይ ካዋቴላ ኡባ ቦላ ጎዳ ጊዲዳይሳኔ
ካዋቴል ኡባ ባ ኮዪዳ ኣሳስ ኢማናስ ዳንዳይዛይሳ ኢዚ ኤራና
ጋካናሳ።

22 «ቤሊሻጸሬ! ኔኒ ኢዛ ና ጊዳ ኡታዳ ሄሳ ኡባ ኤራሼ ኔኒ
ኔና ዚቂ ሂስታቤካ።

23 ሄሳፌ ቦላራካ ሳሎ ጎዳ ቦላ ኔ ኦቶሬታዳ ኔርካ ኔና ቋቁ ቋቁ ሂስታዳሳ፤ ጸሳ ከላፌ ዲኤቲ ዪዳ ዋርቃፌኔ ቢራፔ ኦሴቲዳ ሚሻታ ኔኒ ኤሂሳዳ፣ ኔኒ ኔ ሹሜቲ፣ ኔ ማቼቲኔ ኔ ላጌሶቲ ኢሲፌ ኢስታን ዋይኔ ኡሹ ኡዪዳ፣ ሂስቲዲ ጸላናሰ፣ ሲያናሰ፣ ኣኬካናሰ ዳንዳዮንታይታ ዋርቃፌ፣ ቢራፔ፣ ጸርቂማላፔ፣ ቢራታፔ፣ ሚላፌኔ ሹቻፌ ኦሴቲዳ ኤቃ ጸሳታ ጋላቲዳ፣ ኔ ሼምፖኔ ኔ ኦጌ ባ ኩሼን ኦይኪዳ ጸሳ ቦንቻቤካ።

24 ሄሳ ጊሻስ ኢዚ ጸፊዛ ጸፊዳ ኩሼዛ ዬዲዳሰ።

25 «ጸፊቲዳይሲካ፣ «ማኔ! ማኔ! ቱቄሌ! ፋሪሰ» ጌሰ።

26 ሄሳ ቢርሼሊ ሃይሳፌ ካሊዛይሳ፤ ማኔ! ጉሲ፣ «ጸሲ ኔ ካዋቱላ ላይላ ቆዲዳሰ፤ ወርሴሊካ ጋሊዳሰ» ጉሳ።

27 ቱቄሌ! ጉሲ፣ «ኔኒ ሜዛኔን ጌዳሬታዳሳ፤ ካዉያ ቤታዳሳ» ጉሳ።

28 ፋሪሰ! ጉሲ፣ «ኔ ካዋቱሊ ሻኬቲ ዋዲዳሰ፤ ሜዶኔታሲኔ ፓሪሴታሰ ኢሜቲዳሰ» ጉሳ» ጊ ዛሪዳሰ።

29 ሄሳፌ ጉዬ ቤሊሻጸሬ ኣዛዞን ሄራካ ዳኔላ ኦቻ ቱራ ሚሳቲዛ ሴሎ ማይኦ ማይዚዳ፤ ዋርቃፌ ኦሴቲዳ ሞጋ ኢዛ ቆዴን ኣሊዳ፤ ኢዛ ካዋቱላን ሄሻንሶ ማራን ሹሚዳ።

30 ሄ ጋላሳ ኦማርሰ ባቢሎኔ ካዋ ቤሊሻጸሬይ ኣሳ ኩሼን ሃይቂዳሰ።

31 ሄ ዋዴ ኢዛሰ ላይላይ 62 ጊዲዳ ሜዶኔ ዴሬ ኣሰ ዳሪዮሲ ካዋቱላ ኦይኪዳሰ።

6

ጋሞታ ኦላን ዳኔላ ዬጌቱል

1 ካዋ ዳሪዮሲ ባ ካዋቱላ ኡባ ጊዶን ባፔ ጋርሳራ ቢታ ሃሪዛ 120 ዳናታ ሹማናሰ ኮዪዳሰ።

2 ቃሴ ካዋዛሰ ኣይኮይካ ፓጮንታ ማላ፣ ሄ ቢታ ሃሪዛይታ ጸላና ማላ ሄሹ ኣሳታ ሃላቃ ኦሊዲ ዶሪዳሰ፤ ዶሬቲዳይታፔ ኢሶይ ዳኔላ።

3 ዳኔሊ ሃንኮ ዴሬ ኣይሲዛይታፔኔ ዳናታፔ ኣቶ ኤራቱላን ኩሚዳዴ ጊዲ ቤቲዳ ጊሻሰ ካዋዚ ኢዛ ባ ካዋቱላ ቦላ ሹማናሰ ቆፒዳሰ።

4 ሄሳፌ ጉዬ ሃንኮ ዴሬዛ ኣይሲዛይቲኔ ዳናቲ ዳኔሊ ኦሊዛ ካዋ ኦሶዛ ቦላ ካሳሴ ዴሚዲ ሞታና ኮዪዳ፤ ጊዶ ኣቲን ዳኔሊ

ኬሂ ባና ናጊዛዴ፥ አማኔቲዳዴኔ ኢዛ ኦሶዛ ቦላ ዋሶይ ባይንዳ ጊሻስ ኢዛፔ ሞሮ ዴማናስ ዳንዳይቤቴና።

5 ሄሳ ጊሻስ ኢስቲ ባ ጋርሳን፥ «ኦ ዳኔላ ሞታናስ ኮይኮ ኢዛ ጸሳ ዋጋ ጋሶንፔ ኣቲን ሃራ ኦጌራ ኦ ኢዛ ሞታናስ ኣይ ሞሮካ ዴማናስ ዳንዳዮኮ» ጊዳ።

6 ሄሳፌ ጉዬ ዴሬ ኣይሲዛይቲኔ ዳናቲ ኢሲ ቦላ ካዋዛኮ ቢዲ፥ «ካዋ ዳሪዮሳ! ኔኒ ሜርናስ ካዋታ!

7 ኦኒ ኔ ካዋቲፋ ጋርሳን ዴራ ኣይሳናስ ኡቲዳይቲ ካዋቲፋን ጶቃ ሹማቲ፥ ሞኮኔቲ፥ ዳናቲ፥ ዴሬዛ ኣይሲዛይቲኔ ዘሪዛይቲ፥ ኦኒ ኢሲፌ ዘሬ ቃቺዳ ኢሲ ሚሺ ዴስ፤ ሂሲካ ሃቺፌ ቢዲ ሂቹ ታሙ ጋላስ ጋካናስ ኣይ ኣሲካ ኔናፔ ኣቲን ሃራ ኣይ ጸሲካ ዋይኮ ሃራ ኣሰ ዋሶንታ ማላ ኔ ኣዋጃ፤ ሄሳ ሄ ኣዋጃ ኦሶንታዴይ ጋሞታ ኦላን ዬጌታና ማላ ኔ ኣዛዛ።

8 ሄሳ ጊሻስ ካዋ! ሃይሲ ኣዋጃዚ ሜዶኔኔ ፓሪሴ ዋጋ ማላ ላማቶንታ ሚኖ ጊዳና ማላ ኔኒ ኢዛ ቦላ ኔ ፒሪማ ዋፋ» ጊዳ።

9 ሄሳ ጊሻስ ካዋ ዳሪዮሲ ኣዋጃዛ ጸፊ ፓራሚዲ ኬሲዴስ።

10 ዳኔሊ ኣዋጃዚ ፓራማቲዲ ኬዚዳይሳ ኤሪዳ ማላ ባሶ ቢዴስ፤ ፖቄ ቦላ ማሰኮቴይ ዬሩሳላማ ባጋ ሲሚዲ ዶዬቲ ዲዛ ኪፊሌዛን ካሴ ዋሲዛይሳፉ ጋላስ ጋላስ ሂቹቶ ጉልባቲዲ ዋሲዴስ፤ ባ ጸሳካ ጋላቲዴስ።

11 ሄይቲ ዙፔቲዳ ኣሳቲ ኢሲፌ ቢዲ ዳኔሊ ባ ጸሳ ዋሲሺን ዴሚዳ።

12 ኡባይካ ኢሲፌ ካዋዛኮ ቢዲ፥ «ካዋ! ኔኒ ሃይሳፌ ካሴ ቢዲ ሂቹ ታሙ ጋላስ ጋካናስ ኔፔ ኣቲን ኣሲ ሃራ ኣይ ጸሳሲካ ዋይኮ ኣሳስ ሆኪ ጎይኒዛ ኣሲ ጋሞታ ኦላን ዬጌታና ማላ ኣዋጃ ፓራማ ኬሳቤኪ?» ጊ ኦይቺዳ።

ካዋዚካ «ኤ፥ ሜዶኔኔ ፓሪሴ ዋጋ ማላ ላማቶንታ ሚኖ ኣዋጃይ ኣዋጃቲዴስ» ጊዴስ።

13 ኢስቲካ፥ «ካዋ! ሂስቲን ሄኮ ዩሁዳፔ ዲኤቲ ዬዳይታፔ ኢሶይ ዳኔሊ ኔና ኔ ጸፋ ኬሲዳ ኣዋጃዛ ቦንቼና፤ ኢዚ ሃኢካ ጋላስ ጋላስ ሂቹቶ ባ ጸሳ ዋሴስ» ጊዳ።

14 ካዋዚካ ሄሳ ሲዬዲ ኬሂ ጨጨዴስ፤ ዳኔላ ኣሻናስ ቆፋ ቃቺዴስ፤ ኣርሼይ ዉላና ጋካናስ ኢዛ ኣሻና ኦጌ ሜፋናስ ዳፌቲዴስ።

15 ኣሳቲካ ኢሲፌ ካዋዛኮ ቢዲ «ካዋ! ሜዶኔኔ ፓሪሴ ዋጋን ኢሲ ካዋይ ባ ኣዋጂዳ ኣዋጃ ዋይኮ ባ ኣዛዚዳ ኣዛዙ ላማናስ ዳንዳዮንታይሳ ኔ ኤራ!» ጊዳ።

16 ሄሳ ጊሻስ ዳኔሊ ኦይኬቲ ዪዲ ጋሞታ ኦላን ዩጌታና ማላ ካዎዚ ኣዛዚደሰ። ካዎዚካ ዳኔላ፥ «ኔኒ ኡባ ዎዴ ኣማኔቴላን ኢዛስ ጎይኒዛ ኔ ጎዳይ ኔና ኣሾ» ጊደሰ።

17 ኦላዛ ዶና ሹቻራ ጎርዲዲ ዳኔላ ቦላ ኦሴቶይሲ ላሜቶንታ ማላ ካዎዚ ባ ሚዲጋ ማታሜኒኔ ሹሜታ ሚዲጋ ማታሜን ሾጪደሰ።

18 ሄሳፌ ጉዬ ካዎዚ ጌዴ ባሶ ካዎ ኬላ ሲሚደሰ፤ ካዎካ ሚቤና፤ ኢዛ ኡፋይሲዛ ሚሺ ኢዛኮ ሺቆንታ ማላ ኢዲዲ ዲስኮይ ባይንዳ ኣቂደሰ።

19 ማላዶ ዎንታራ ቡሮ ባዘይ ዞኢሺን ካዎዚ ዴንዲዲ ኤሶን ጋሞታ ኦላኮ ቢደሰ።

20 ኢዚ ሄ ጋኪዳ ማላ ጩጪሼ፥ «ዴኦ ጸሳ ኦሳንቻ ዳኔላ! ኔኒ ኢዛስ ኣማኔቴላን ኦሊዛ ኔ ጸሳይ ኔና ጋሞታፔ ኣሻናሰ ዳንዳይዴ?» ጊዲ ጴይጊደሰ።

21 ዳኔሊካ ኢዛስ፥ «ካዎ! ኔኒ ሜርናሰ ካዎታ!

22 ጋሞቲ ታና ቆሆንታ ማላ ጸሲ ባ ኪታንቻ ታኮ ከቲዲ ኢስታ ዶና ጎርዲደሰ፤ ኢዚ ሄሳፋ ኦሊዳይ ታኒ ኢዛ ኣቻን ጲሎኔ ኔናካ ታኒ ቆሆንታይሳ ኢዚ ኤሪዛ ጊሻሳ» ጊ ዛሪደሰ።

23 ካዎዚ ኬሄ ኡፋዬቲደሰ፤ ዳኔላካ ጋሞ ኦላ ጊዶፌ ኬሳና ማላ ኣዛዚደሰ። ዳኔሊ ባ ጸሳን ኣማኔቲዳ ጊሻስ ኢዚ ኦላፌ ኬዚዳ ዎዴ ኢዛ ቦላ ኢሲ ቆሆይካ ጋኪቤና።

24 ሄሳፌ ጉዬ ካሴ ዳኔላ ዎርዶራ ሞቲዳ ኣሳቲ ባ ማቼታራ፥ ባ ናይታራ ኦይኬቲ ዪዲ ጋሞታ ኦላን ዩጌታና ማላ ካዎዚ ኣዛዚን ጋሞታ ኦላን ኢስታ ዩጊዳ፤ ኢስቲ ኦላን ዱጌ ጋኮንታ ዲሺን ጋሞቲ ፑዚ ዩጊዲ ኢስታ ሜቄላታ ኒፊፊ ሂስቲ ሜንሐሬሊዳ።

25 ሄሳፌ ጉዬ ካዎ ዳሪዮሲ ኣላሚ ቦላ ዲዛ ዴራሰ፥ ካዎቴላታሲኔ ዱማ ዱማ ቃላን ሃሳይዛ ኣስ ኡባስ ሃይሳፌ ካሊዛ ኪታ ጳፊ ከቲደሰ፤

«ሳርይ ኢንቴስ ጊዶ!

26 ታ ካዎቴላን ዲዛ ዴሬይ ዉሪካ ዳኔላ ጸሳስ ያያና ማላኔ

ኢዛ ቦንቻና ማላ

ታኒ ኣዎጃ ኬሳዲሰ፤

ኢዚ ሜርናሰ ዴኢዛ ዴኦ ጸሳ፤

ኢዛ ካዎቴሊ ቆሆንታ

ካዎቴላ፤

ኢዛ ካዎቴላሰካ

ዉርሴሊ ዴና።

27 ኢዚ ኣሼሲኔ ማዳሰ፤
 ኢዚ ሳሎኒኔ ሳኣን ማላታታኔ
 ማላሊሲዛ ሚሻታ ኦፊሰ፤
 ኢዚ ዳኔላ ጋሞታ
 ደናፔ ኣሼዳሰ» ጊዳሰ።

28 ሄሳ ጊሻሰ ዳኔሊ ካዎ ዳሪዮሳ ካዎቲላ ዎዴኒኔ ፓሪሴ ዳሬ
 ኣሰ ቂሮሳ ካዎቲላ ላይላ ኡባን ኢዛሰ ዳኦይ ኢንጃቲዳሰ።

7

ዳኔላሰ ኣጁታን ቆንጨዳ ኦይዱ ዶኣታ

(7:1—12:13)

1 ባቢሎኔ ካዎ ቤለሻጾሬይ ካዎቲዳ ኮይሮ ላይላ ዳኔሊ ባ
 ኣልጋን ኢቺ ዲሼ ኣጉሞኔ ኣጁታ ቤዪዳሰ፤ ሄሳፊ ጉዬ ባ ቤኢዳ
 ኣጉሞዛ ጸፊዳሰ።

2 ዳኔሊ፡ «ሳሎ ጫርኮ ኦይዳቲ ዎጋ ኣባ ቃሊሺን ኦማርሰ
 ኣጁታን ቤያዲሰ።

3 ዲማ ዲማ ቆሞ ዎጋ ጊታ ኦይዱ ዶኣቲ ኣባፊ ኬዚዳ።

4 «ኮይሮ ዶኣዚ ጋሞ ሚሳቲሰ፤ ኢዛሰ ጎሌ ቄፌ ማላ ቄፊቲ
 ዴቲሰ፤ ታኒካ ጸሎን ዲሺን ሄ ቄፊቲ ሾዴቲ ሾዴቲ ዎዲዳ፤ ሄ
 ዶኣዚ ቆቁ ጊዲ ኣሳ ማላ ናሞኡ ቶሆታን ኤቂዳሰ፤ ኢዛሰ ኣሳ
 ዎዚናይ ኢማቲዳሰ።

5 «ናሞኣንሶ ዶኣዚ ዛርዶ ዶኣ ሚሳቲሰ፤ ኢዚ ኢሲ ሚሊን ቆቁ
 ጊ ኤቂዳሰ፤ ኢዚ ባ ኣቻን ሄሹ ሚሊ ሜቂላታ ሳጺ ኦይኪዳሰ፤
 ሳኔ ኮዪዳ ኬና ኣሾ ማ፡ ጊዛ ቃላይ ኢዛሰ ዮቴቲዳሰ።

6 «ታኒ ሄሳ ጸሎን ዲሺን ማሄ ሚሳቲዛ ሃራ ዶኣይ ኬዚዳሰ፤
 ኢዛሰ ካፎ ቄፌ ሚሳቲዛ ኦይዱ ቄፊቲ ዘኮ ቦላ ዴቲሰ። ኦይዱ
 ሁኤቲ ኢዛሰ ዴቲሰ፤ ጎዳቴላካ ኢዛሰ ኢማቲዳሰ።

7 «ሄሳፊ ጉዬ ኦይዳንሶ ዶኣዛ ታ ቤያዲሰ፤ ኢዚካ ኬሂ
 ባቢሲዛ፤ ዳጋንሊዛዚኔ ዎልቃማ ዶኣ፤ ሄ ዶኣዛሰ ፑዜሬሊዛኔ
 ሜንሉሬሊዛ ቢራታ ሚሳቲዛ ጊታ ኣቻቲ ዴቲሰ። ኢዚ ሚሺን
 ኣቲዳይሳ ባ ቶሆታን ዬዴቲሰ፤ ካሴ ኣዲዳ ዶኣታ ኡባፊ ኢዚ
 ዲማ፤ ኢዛሰ ታሙ ካጩቲ ዴቲሰ።

8 «ታኒ ካጩታ ጊሻሰ ቆፋን ዲሺን ካጩታ ጊዶራ ሃራ ኢሲ
 ጉላ ካጩይ ኬዚዳሰ። ኮይሮ ካጩታፔ ሄሻቲ ሾዴቲ ዎዲዳ፤ ሄ
 ጉላ ካጩዛሰ ኣሳ ኣይፊይኔ ኦቶሬቲላን ሃሳይዛ ዶናይ ዴሰ።

9 «ታ ጸሎን ዲሺን
 ኣራታቲ ሚጨቲዳ፤
 ቤኒ ቤኒሶፌ ዲዛይሲ
 ኢዛ ቦላ ኡቲዴሰ፤
 ኢዛ ማይኦይ
 ሻቻ ማላ ቦላ፤
 ኢዛ ቢናናይካ
 ፑቶ ማላ ቦላ፤
 ኢዛ ኣራታይ ታማ ላጮ፥
 ኢዛ ፓራ-ጋሬቲ ኤጲዛ ታማ ማላ።

10 ኢዛ ሲንፋራ ታማ ሃላ
 ፑልቲ ጎጌሰ፤
 ኢዛሰ ዳሮ ሺያን ቆዴቲዛ
 ኦሳንቻቲ ዴቴሰ፤
 ቆዳይ ባይንዳ ዴሬይ
 ኢዛ ሲንፋን ኤቂዴሰ፤
 ፒርዳ ሺሎታይካ ኡቲዴሰ፤
 ማጻፋቲካ ደፎቲዳ።

11 «ታኒ ሄ ካጨዚ ሃሳይዛ ኦቶሮ ቃላፔ ዴንዲዳይሳን ታ
 ኢዛኮ ጉጃ ጉጃ ጸላዲሰ፤ ሄ ዶኣዚ ኦይኬቲዲ ሹኬታና ጋካናሲኔ
 ኢዛ ኣሾይ ሲፋሌቲዲ ጌዴ ላጪዛ ታማን ኦሌታና ጋካናሰ ታኒ
 ዴሎ ኣጋቤኬ።

12 ሃንኮ ኣቲዳ ዶኣታ ጎዳቴላ ኢሰታፌ ኤኬቲዴሰ፤ ጊዶ ኣቲን
 ጉላ ዎዴሰ ኢሰቲ ሺዎፖራ ፓጻ ዴኣና ማላ ፒቃዴይ ኢሜቲዴሰ።

13 «ኣሳ ና ሚሳቲዛዴይ ሳሎ ሻራይ ኢዛ ጊዶላ ኦይኪን
 ዪዛይሳ ኦማርሰ ኣጁታን ቤያዲሰ፤ ኢዛ ጌዴ ቤኒ ቤኒሶፌ
 ዲዛይሳኮ ሺሺዳ።

14 ኣላሜ ቦላ ዲዛ ኣሰ ኡባይ፥ ካዎቴላቲ ኡባይኔ ዴማ ዴማ
 ቃላን ሃሳይዛ ዛሬቲ ኡባይ ኢዛሰ ሃጋዛና ማላ ጎዳቴላ፥ ቦንቾይኔ
 ካዎቴላ ኢዛሰ ኢሜቲዴሰ፤ ኢዚ ሜርናሰ ሃራና፤ ኢዛ ካዎቴላሰካ
 ዉርሴላ ዴና።

ኣጁታዛ ቢርሺል

15 «ታኒ ዳኔሊ ሃይሳ ታ ቤኢዳ ኣጁታን ኬሃ ሜቶታዲሰ፤ ታ
 ሺዎፖያካ ጨጫዲሰ።

7:9 ኣጁ 20:4፤ 1:14 7:10 ኣጁ 5:11፤ 20:12 7:13 ማቶ 24:30፤
 26:64፤ ማር 13:26፤ 14:62፤ ሉቃ 21:27፤ ኣጁ 1:7፤ 13፤ 14:14 7:14 ኣጁ
 11:15

16 ታስ ሄን ጋዳን ኤቂዳይታፔ ኢሳኮ ሺቃዳ ሃይሳ ኡባ ቱሙ ቢርሼል አዛኮ ኦይቻዲሰ፤ ኢዚካ ታስ ሄሳ ኡባ ቢርሼል ሾቲዴሰ።

17 ኢዚካ ታስ፡ «ሃይቲ ዋጋ ጌታ ኦይዱ ዶኦቲ ቢታፊ ዴንዳና ኦይዱ ካዋታ።

18 ጌዶ አቲን ኡባፊ ቆቃ ጸሳ ጌሻቲ ኢዛ ካዋቲላ ባሰ ኤካና፤ ሜርናሰ ኦይካና፤ ኤ ሜርናሰ ኢሰቲ ኦይካና፤ ጌዴሰ።

19 «ሃሳፊ ጉዬ ታኒ ሃንኮ ዶኦታ ኡባፊ ዱማቲዱ ያሺሲዛ ኦይዳንሶ ዶኦሲ ዱዛ ቱሙ ቢርሼል ኤራናሰ ኮያዲሰ። ሄ ዶኦሰ ቢራታ ኦቺኔ ጸርቂማላ ጸጉንሱ ዴሰ፤ ኢዚ ባናራ ጋይቲዳ ኡባ ሜንሼሬሊ ሜሰ፤ ሚሺን ኦቶይሳ ባ ቶሆን ዬዴሬቲሰ።

20 ቃሶካ ሄ ዶኦዛ ሁኤን ዱዛ ታሙ ካጩታ ጌሻሰ፡ ኢሰታ ጌዶን ሞኪዳ ካጩ ጌሻሲኔ ሄ ካጩታ ጌዶፊ ሾዴቲዳ ሄዙ ካጩታ ጌሻሰ ሃሳሶካ ሃራታፔ ኦቂዛ ኦሳ ኦይፊ ሚሳቲዛ ኦይፊታ ጌሻሰ፡ ኦቶርቲላን ሃሳይዛ ዶናይ ኢዛሰ ዱዛ ሃ ካጩዛ ጌሻሰ ታ ኤራናሰ ኮያዲሰ።

21 ቤኢቲ ታ ጸሊሺን ሃይሲ ሃ ካጩዚ ጌሻታ ቦላ ኦላ ኦዋጂዱ ኢሰታ ጸኒዴሰ።

22 ሄሲካ ሃኒዳይ ቤኒ ቤኒሶፊ ዱዛይሲ ያና ጋካናሲኔ ኡባፊ ቆቃ ጸሳይ ጌሻታሰ ቱማ ፒርዳ ፒርዳና ጋካናሳ። ጌሻቲ ኢዛ ካዋቲላ ላቲዛ ዋዴይ ጋኪዴሰ።

23 «ኢዚካ ታስ ሄሳ ቢርሼል፡ «ሄ ኦይዳንሶ ዶኦዚ ቡርፔ ቢታ ቦላ ዴንዳና ኦይዳንላ ካዋቲላ፤ ሄሲ ሄ ካዋቲላይ ኡባፊ ዱማ ጌዱዳ ጌሻሰ ኢዚ ቢታ ኡባ ዋራጂዱ ባ ቶሆን ዬዳና፡ ሊቂሳናኔ ማና።

24 ታሙ ካጩቲ ሄ ካዋቲላ ጌዶፊ ኬዛና ታሙ ካዋታ፤ ሃሳፊ ጉዬ ካሴ ካዋታፔ ሃራ ዱማ ካዋይ ዴንዱዱ ሄ ታሙ ካዋታፔ ሄዛታ ሺሪ ዬጋና።

25 ኢዚ ኡባፊ ቆቃ ጸሳ ቦላ ማካላ ቃላ ሃሳያና፤ ኢዛ ጌሻታ ኢዚ ዋዴሳና፤ ኢዛ ቦንቾ ባኦሌታኔ ኢዛ ዋጋ ላማናሰ ኢዚ ዳፊታና፤ ጌሻቲ ሄዙ ላይሊኔ ባጋ ጋካናሰ ኢዛ ጎዳቲላ ጋርሳን ዴኦና።

26 « «ሃሳፊ ጉዬ ፒርዳ ኦራታይ ሚጩታና፤ ኢዛ ካዋቲላይ ኢዛፔ ቃሬቲ ኤኬቲን ኢዚ ሜርናሰ ሙሌራ ዳያና።

7:18 ኦጁ 22:5 7:21 ኦጁ 13:7 7:22 ኦጁ 20:4 7:24 ኦጁ 17:12

7:25 ኦጁ 12:14፤ 13:5-6

27 ሳሎፔ ጋርሳራ ዴኢዛ ካዎቲላ ኡባ ማታይ፥ ዋልቃይኔ ጌታቲላይ ኡባፌ ጶቃ ጸሳ ዴሬ ጌሻታሰ ኢሜታና። ኢዛ ካዎቲላይካ ሜርና ካዎቲላ ጌዳና፤ ዴሬዛ ሃሪዛይቲ ኡባቲ ኢዛሰ ኣዛዜታናኔ ኢዛሰ ጎይናና፤ ጌዴሰ።

28 «ታ ኣጁታ ቢርሼላ ሃይሳን ፖሌቲሰ፤ ታኒ ዳኔሊ ታ ቆፋን ከሃ ጨጫዲሰ፤ ታ ኣይፌሶይ ላሜቲዴሰ፤ ጌዶ ኣቲን ታኒ ሃይሳ ወርሳካ ታ ዋዚናን ቁምኣ ኦይካዲሰ» ጌዴሰ።

8

ዳኔሊ ኣጁታን ቤኢዳ ጳርሾኔ ኦርጌ

1 ቤለሻጸሬይ ካዎቲዳ ሄቫንሶ ላይላን ታኒ ዳኔሊ ሃይሳፌ ካሴ ቤኢዳይሳፌ ሃራ ኣጁታ ቤያዲሰ።

2 ኤላማ ኣወራጃን ሱሳ ገምቤ ማታን ኣጁታን ታና ቤያዲሰ፤ ኣጁታዛን ታኒ ኡላዬ ሻፋ ኣቻን ዳይሰ።

3 ታኒ ጶቁ ሂሰታ ጸላሼ ሄ ሻፋዛ ኣቻን ናምኡ ጌታ ካጩቲ ዲዛ ኢሰ ጳርሾይ ኤቁዳይሳ ቤያዲሰ፤ ካጩቲ ኣዲሳ፤ ሄ ካጩታፔ ኢሶይ ኣዲቁ ኤኬሰ፤ ጌዶ ኣቲን ኢዚ ሞኪዳይ ጉዬፔ።

4 ሄ ጳርሾዚ ባ ካጩን ኣርሼይ ወሊዛ ባጋ፥ ፑዶሃ ባጋኔ ዲጌሃ ባጋ ቃይጩሰ፤ ኣይ ሜዶሳይካ ኢዛራ ኤቁታና ዳንዳይቤና፤ ኢዛ ኩሼፔካ ኣሻና ዳንዳይዛይ ዳና፤ ኢዚ ባ ኮዬዳ ማላ ኦሊዴሰ፤ ሂሰቲዲ ካሴፔካ ሚኒ ሚኒ ቢዴሰ።

5 ታኒ ሄሳ ሄ ኣጁታዛ ጌሻሰ ዩሻ ቆፒሺን ኢዛ ኣይፌታፔ ጌዶን ጌታ ካጩይ ዲዛ ዴይሻ ኦርጌይ ቶሆን ጋዴ ዩጶንታ ዲሼ ቢታ ካንሒዲ ቆፖንታ ኣርሼይ ወሊዛ ባጋፌ ዩዴሰ።

6 ካሴ ሻፋ ኣቻን ኤቁ ዲሺን ታ ቤኢዳ ናምኡ ካጩራ ዲዛ ጳርሾዛኮ ሃንቆራ ዲዲሚ ዩዲ ኢጨዴሰ።

7 ኢዚ ጳርሾዛኮ ሺቁሺን ታ ቤያዲሰ፤ ኢዚ ጳርሾዛ ሃንቆን ኢጨዲ ጳርሾዛ ካጩታ ናምኣታ ሚንፊሬላ ዩጌዴሰ፤ ጳርሾዚካ ኢዛራ ኤቁታናሰ ዋልቃ ጳይዴሰ፤ ሄሳ ጌሻሰ ኦርጌዚ ጳርሾዛ ዲጌ ቢታ ቦላ ዩጌዲ ኢዛ ባ ቶሆን ዩጲ ኤቁዴሰ፤ ጳርሾዛ ዴይሻፌ ኣሻና ዳንዳይዛይ ቤቲቤና።

8 ዴይሻ ኦርጌዚ ከሂ ሚኒ ሚኒ ዋልቃቲ ቢዴሰ፤ ጌዶ ኣቲን ኢዚ ባ ዋልቃን ሚኒ ሚኒ ቢዳ ዋዴ ኢዛሰ ጌታ ካጩዚ ሜቂ ዋጲዴሰ፤ ሄ ካጩዛሶሆዛን ሃራ ኦይዱ ጌታ ካጩቲ ሞኪዳ፤ ኢሰቲ ኡባይካ ሳሎ ጫርኮ ኦይዳታ ባጋ ሲሚ ዲጨዲዳ።

9 ሃይታ ኦይዱ ካጩታ፤ ኢሳ ቦላ ሃራ ጉላ ካጩታ ሞኪዳሰ፤ ሄ ጉላ ካጩታ ወልቃይ ዱጌሃ ባጋኔ ኣርሼይ ሞኪዳ ባጋ ጌዴ ሎኦ ዴሬይኮ ኬሂ ዲጪ ዲጪ ቢዳሰ። *

10 ፑዴ ሳሎ ሜዴቴላታኮ ጋካናሰ ጶቁ ጊዳሰ፤ ሳሎ ጸሊንቲታ፤ ኣማርዳይታ ዱጌ ቢታ ቦላ ዬጊዲ ኢሰታ ቦላ ዱሬቲዳሰ።

11 ሳሎን ዲዛ ሜዴቴላታ ሃላቃራ ጊናታና ኮዬዲ ባና ጶቁ ዶቁ ሂሰቲዳሰ፤ ጋላሰ ጋላሰ ሸቁዛ ያርሾዚ ኢዛሰ ሸቆንታ ማላ ዲጊዳሰ፤ ጸሳ ኬላካ ቱኒሲዳሰ።

12 ማካላቴላ ጋሶን ጌሻታ ኦላንቻቲኔ ጋላሰ ጋላሰ ሸቁዛ ያርሾዚ ኢዛሰ ኣሜቲዳሰ፤ ኢዚ ኦሊዛ ሚሺ ወሪካ ኢዛሰ ጊጊ ጊጊ ቢዳሰ፤ ቱማይካ ዱጌ ሳኣን ኦሊቲዳሰ።

13 ሄሳፌ ጉዬ ጌሻታ፤ ኢሶይ ሃሳይሺን ታ ሲያዲሰ፤ ቃሴ ጌሻታ፤ ሃራይ ኢሶይ ኢዛሰ፡ «ሃች ሃች ያርሺዛ ያርሾ ኣጁታይ ፖሌታና ወዴይ ኣይዴ? ሃ ማካላቴላ ጋሶን ዪዛ ባሻይ ኣዉዴ ጋካናሰ ጋምኣኔ? ቃሴካ ሳሎ ኦላንቻቲኔ ጸሳ ኬላይ ኣዉዴ ጋካናሰ ዬዴቲሼ ዳኔ?» ጊ ኦይቺዳሰ።

14 ሄ ኦይሹቲዳ ጌሻይካ፡ «2,300 ማላዶኔ ኦማርሰ ጋካናሰ ጋምኣና፤ ሄሳፌ ጉዬ ጸሳ ኬላይ ጌያና» ጊሺን ታ ሲያዲሰ።

ኣጁታዛ ቢርሼል

15 ታኒ ዳኔሊ ሃይሳ ኣጁታዛ ጸሊሺኒኔ ዩሻ ቆፒሺን ኣሴ ሚሳቲዛይ ታ ሲንላን ኤቁዳሰ።

16 ኡላዬ ሻፋፔ ሄ ፒንላን፡ «ጋብሬሌ! ሃይሳ ኣዴዛሰ ኣጁታዛ ቢርሼል ዮታ!» ጊ ዋሲዛ ኣሳ ጩንጉርሰ ሲያዲሰ።

17 ጋብሬሌይ ታ ኤቃ ዲዛሶ ማቲ ማቲ ዪሺን ታ ዳጋማዳ ሲንላ ጉል ጉፋናዲሰ፤ ኢዚካ፡ «ኣሳ ናዉ! ሃይሲ ኣጁታዚ ቤሲዛይ ኣላሜ ወርሴላ ጊሻሰ ጊዲዳይሳ ኔ ኣኬካ» ጊዳሰ።

18 ኢዚ ሄሳ ዮቲሺን ታኒ ቢታ ቦላ ሲንላ ጉል ጉፋናዲሰ፤ ኬሃ ጴሰኮ ሴራዲሰ፤ ኢዚ ጊዲኮ ታና ካፊዲ ፑዴ ዴንሉ ታ ቶሆን ኤሲዳሰ።

19 ኢዚ ታና፡ «ሃይሲ ኣጁታዚ ኣላሜ ወርሴላን ሃናና ዮኦታ ቤሴሰ፤ ጉዬፔ ሃንቆ ወዴ ኣዚ ሃናናኮ ታ ኔሰ ዮታና።

* 8:9 ሎኦ ዴሬ ጊዛይሲ ካሴ ኣይሁዳቲ ባንታ ዴሬ ኢሰራኤሌ ቤሳናሰ ጎኤቲዛ ቃላ። 8:10 ኣጁ 12:4 8:16 ሉቃ 1:19:26

20 ኔ ቤኢዳ ናምኡ ካጩራ ዲዛ ጳርሾዚ ሜዶኔኔ ፓሪሴ ካዎቲላታ ቤሴስ።

21 ዳይሻ ኦርጌዚ ገሪኬ ካዎቲላ ቤሴስ፤ ኢዛ ኣይፊታ ጊደን ዲዛ ጌታ ካጩዚ ኮይሮ ካዎዛ ቤሴስ።

22 ሜቂዳሶዛን ሞኪዳ ኦይዱ ካጩቲ ሄ ካዎቲላይ ኦይዱ ኬዛናይሳ ቤሴቲስ፤ ጊዶ ኣቲን ኮይሮ ካዎቲላ ማላ ሚኖ ጊደንታይሳ ቤሴስ።

23 «ኢስታ ካዎቲላ ዉርሴላ ዎዳይ ጋኪሺን ማካላንቻቲ ኢታቲላን ጉጂ ጉጂ ቢዛ ዎዳ ባቢሲዛ ሲንሒ ዲዛ ባሌሒዛ ካዎይ ካዎታና።

24 ሄ ካዎዚ ኬሂፔ ሚናና፤ ጊዶ ኣቲን ባ ዎልቃን ሚኔና፤ ሻጺዛ ኢታ ሚሽ ኦላና፤ ኢዚ ኦሒዛ ኡባይ ኢዛስ ጌጋ ጊዳና፤ ጌታ ኣሳታኔ ጌሻታ ጳይሳና።

25 ኢዚ ማካላንቻ ጊዲዳ ጊሻስ ሾጮቹ ሾጮቹ ዱሬታና፤ ኢዚ ባና ባርካ ጌታ ማላ ቆዳና፤ ሳርን ዶስ ጊሺን ኢዚ ዳርታ ጳይሳና፤ ካዎታ ካዎ ቦላ ኢዚ ዴንዳና፤ ሂስቲኮካ ዛሪዲ ኢዚ ጳያና፤ ጊዲኮካ ኣሳ ዎልቃን ጊዳና።

26 «ማላዶኔ ኦማርሳ ዎዳ ሽቂዛ ያርሾ ጊሻስ ኔ ቤኢዳ ኣጂታይ ቱማ፤ ጊዶ ኣቲን ሃ ኣጂታይ ፖሌታናይ ቡሮ ዳሮ ላይላፊ ጉዬን ጊዲዳ ጊሻስ ኔ ዎዚናን ቁምኣ ኦይካ» ጊዳስ።

27 ታስ ዳኔላስ ዎልቃይ ኢጲዳስ፤ ዳሮ ዎዳካ ሳኬታ ኢቻዲስ፤ ሄሳፊ ጉዬ ዴንዳዳ ካዎ ኦሶሶ ባዲስ፤ ታ ቤኢዳ ኣጂታን ኬሃ ዳጋማዲስ፤ ታ ኤራፔ ቦላ ጊዲዳስ።

9

ዳኔላ ዎሳ

1 ሜዶኔ ዳሬ ኣስ ኣርጾኪሲሴ ና ዳሪዮሲ ባቢሎኔን ካዎቲዳስ።

2 ኢዚ ካዎቲዳ ኮይሮ ላይሒ ታኒ ዳኔሊ ካሴ ናቤ ኤርማሳስ ኢማቲዳ ጎዳ ቃላ ማላ ዬሩሳላሜይ ላሌታዳ ላፑን ታሙ ላይላ ጋምኣናይሳ ጌሻ ማጸፋታፔ ኣኬካዲስ።

3 ሄሳ ጊሻስ ታኒ ማቃ ማይኣዳኔ ቢዲንላ ቦላ ኡታዳ ጸማናስ፤ ዎሳናሲኔ ጋናታናስ ታ ኣይፊ ፑዳ ጎዳ ጸሳኮ ዴንላዲስ።

4 ታኒ ጎዳ ታ ጸሓ ዋሳሽኔ ፓጻሽ፡ «አቤት ጎዳ ጸሓው፤ ኔና ሲቁዛይታሲኔ ኔ አዛዞታ ናጊዛይታሰ ኔኒ ኔ ጫቂዳ ቃላኔ ሜርና ሲቆዛ ናጊዛ ጊታኔ ያሺሲዛ ጸሓ።

5 ኑኒ ጊዲኮ ናጋራ ኦሊዶስ፤ ኔና ቆሂዶስ፤ ኢታ ሚሽ ኦሊዶስ፤ ማካሊዶስ፤ ኔ አዛዞታፔኔ ኔ ዋጋፔ ካሬ ኬዚዶስ።

6 ኑኒ ኑ ካዋታሰ፡ ኑና አይሲዛይታሰ፡ ቤኒ ኑ አዋታሲኔ ሄ ቢታይ ቦላ ዲዛ ዴሬ ኡባሰ ኔ ሱንፋን ዮቲዳ ናቤ ጊዲዳ ኔ ኦሳንቻታ ሲጸቤኮ።

7 «አቤት ጎዳዉ! ኔኒ ጸሎ፤ ኑኒ ጊዲኮ ኔሰ አማኔቶንታ ጊሻሰ ኑና ቢታ ኡባ ቦላን ኔ ላሊዳ የሁዳ አሳይ፡ ዬሩሳላሚ አሳይኔ ኩሜፋ ኢሰራኤል አሳይ ማታን ጊዲን ሃሆን ዲዛ ኡባይ ሃኢ ዬላቲዶስ።

8 አቤት ጎዳዉ! ኑኒ ወሪካ ኔና ቆሂዳ ጊሻሰ ኑ ካዋታ፡ ኑና አይሲዛይታኔ ካሴ ኑ አዋታኔ ኑና ዬላይ ጋኪዴስ።

9 አቤት ጎዳ ኑ ጸሓዉ! ኑኒ ኔ ቦላ ማካሊኮካ ኔኒ ማሪዛኔ አቶ ጊዛ ጸሓ።

10 አቤት ጎዳ ኑ ጸሓዉ! ኑኒ ኔሰ አዛዜቲቤኮ፤ ኔ ኦሳንቻ ጊዲዳ ናቤታ ባጋራ ኔ አሚዳ ዋጋታ ናጊቤኮ።

11 ኢሰራኤል አሳይ ኡባይ ኔሰ አዛዜቲቤና፤ ኔ ዋጋካ ኡባ ሜንሊዲ ካሬ ኬዚዴስ።

«ኑኒ ኔና ቆሂዳ ጊሻሰ ኔ ኦሳንቻዛ ሙሴ ዋጋን ጸፊቲዳ ጫቆዚኔ ቃንጌፋዚ ኑ ቦላ ጋኪዴስ።

12 ለኢንቲ ቦላኔ ኢንቲና ካሌሊዛይታ ቦላ ታ ጊታ ሜቶ ኤሃና፡ ጋዳ ካሴ ኔ ዮቲዳይሳ ኡባ ኑ ቦላ ፖላዳሳ፤ ሄ ዋዴ ዬሩሳላሚ ቦላ ጋኪዳ ቂጻቲ ማላይ ሃራሶ አዋንካ ጋኪቤና።

13 ካሴ ሙሴ ዋጋን ጸፊቲዳ ማላ ኔኒ ሃይሳ ሃ ሜቶዛ ወርሳካ ኑ ቦላ ኤሃዳሳ፤ ጎዳ ኑ ጸሓዉ! ሄሲ ወሪ ሃኒንካ ኑኒ ኑ ናጋራፔ ሲሚዲኔ ቱማ ካሊዲ ኔፔ ማሮቲል ዴማናሰ ኮጸቤኮ።

14 ጎዳ ኑ ጸሓይ ባ ኦሊዛ ኦሶ ኡባን ጸሎ፤ ጎዳይ ኑ ቦላ ባሽ ኤሃናሰ ዋዴቲቤና።

15 «አቤት ጎዳ ኑ ጸሓዉ! ሃይሳፊ ካሴ ኔኒ ኔ ዴሬዛ ኔ ሚኖቲፋን ጊብጾፔ ኬሳዳ ሃቕ ጋካናሰ ኔ ሱንፋይ ኤሬታና ማላ ኦላዳሳ፤ ኑኒ ጊዲኮ ናጋራ ኦሊዶስ፤ ኔናካ ቆሂዶስ።

16 አቤት ጎዳዉ! ኑኒ ካሴ ኦሊዳ ጸሎ ኦሶዛ ጊሻሰ ጋዳ ኔ ካታማ ዬሩሳላሚ፤ ኔ ጌሻ ዙማፔ ኔ ሃንቆዛ ዛራ፤ ኑ ናጋራኔ ኑ አዋታ ቆሆ ጋሶን ዬሩሳላሚይኔ ኔ ዴሬይ ኑ ዩሽን ዲዛ ዴራ ጊዶን ቂዴሰ አቲዶስ።

17 «አቤት ኑ ጸሳው! ሃኢ ኔ ኦሳንቻ ዋሳኔ ጋናቴላ ሲያ፤ አቤት ጎዳው፤ ኔ ሱንላ ገሻሰ ጋዳ ላሌቲዳ ኔ ኬላኮ ኔ ሲንላ ዛራ።

18 አቤት ጸሳው! ኔ ሃይላ ታኮ ዛራዳ ታ ዋሳ ሲያ፤ ኔ አይፌ ዶይኣዳ ኑ ጳይዛይሳኔ ኔ ሱንላ ጳይጌቲዳ ካታማዮ ቤኣ፤ ኑኒ ኔና ዋሲዛይ ኔ ጌታ ማርቴላን አማኔቲዱ አቲን ኑ ጸሎቴላን ጨቁቲዱ ጌዳና።

19 አቤት ጎዳው! ኑ ዋሳ ኤዘጋ! ኑና ማራ! ኔኒ ሲያዳ ኦላ! ሃዮ ካታማይኒኔ ዳራ ቦላ ኔ ሱንላ ጳይጌቲዳሰ፤ ጎዶ ኔ ሱንላ ገሻሰ ጋዳ ጋሞኦፋ» ጋ ዋሳዲሰ።

ጋብሬሌይ ቆንጪሲዳ አጁታ

20 ታኒ ታ ናጋራኔ ታ ዳሬ ኢሰራኤሌ አሳ ናጋራ ፓጸሼ ጌሻ ዙማ ገሻሰ ጎዳ ታ ጸሳ ሲንላን አጎንታ ዋሳዲሰ።

21 ታኒ ዋሳ ቦላ ዳሼ ኮይሮ አጁታን ቤኢዳ ጋብሬሌይ ኦማርሳ ዋዳ ያርሾይ ሽቂዛ ዋዳን ታኮ ኤሶን ፒራጲሼ ዪዳሰ።

22 ኢዚ ታና ታማርሲሼ፤ «ዳኔላ! ሃኢ ታ ኔሰ አጼ ኤራቴሉኔ አኬካ አማና ያዲሰ።

23 ኔ ኬሃ ዶሴቲዳዳ ጌዲዳ ገሻሰ ኔ ቡሮ ዋሳ ዶሚሺን ጸሲ ኔ ዋሳ ሲዪዳሰ፤ ታኒካ ሄሳ ኔሰ ዮታና ያዲሰ፤ ሄሳ ገሻሰ ሃኢ ታ ኔሰ ዮቲዛይሳ ዋዚናን ዋላ፤ አጁታዛካ አኬካ።

24 «ማካላቴላ ኤሳናሰ፤ ናጋራ ዲጋናሰ፤ ቆሆ ዉርሳናሰ፤ ሜርና ጸሎቴላ ኤሃናሰ፤ አጁታኔ ቲንቢቲ ማታሜን ሾጫናሰ፤ ጌሽ ጌዲዳ ጌዶ ቆልኣ ቲሰታናሰ ኔ ዳራ ገሻሲኔ ኔ ጌሻ ካታማይ ገሻሰ ላቸን ታሙ ሳሚንታይ አዋጃቲዳሰ።

25 «ኔ ሃይሳ ኤራ፤ አኬካ፤ ዬሩሳላሜ ዛሪ ኦላናሲኔ ኦራላናሰ አዋጃይ ኬዚዳ ጋላሳፌ ዶሚዲ ሃሪዛ ቲዬቲዳዳይ ያና ጋካናሰ ላቸን ሳሚንታኔ ኡሱቸን ታማኔ ናሞኡ ሳሚንታ ጌዳና፤ ዬሩሳላሜ ኦጌቲኔ ኢዚሰ ዲርሳቲ ዛሪ ኦራጸና፤ ሄሲ ፖሌታናይ ሜቶ ዋዳና።
*

26 ኡሱቸን ታማኔ ናሞኡ ሳሚንታታፔ ጉዬን ቲዬቲዳዳይ አይኮ ሞሮይ ባይንዳ አሳ ኩሼን ሃይቃና፤ ቡሮ ያና ሃላቃዛ አሳቲ ዬሩሳላሜኔ ጸሳ ኬላ ዲፒ ሂሰቲ ጳይሳና፤ ኢዛ ዉርሴላካ

9:21 ሉቃ 1:19፥26 * 9:25 ላቸን ታሙ ሳሚንታ፤ ላቸን ሳሚንታኔ ኡሱቸን ታማኔ ናሞኡ ሳሚንታ ጌዛይሳ ኢሲ ኢሲ ጌሻ ማጻፋን ላይላታን ቆዴቲሰ።

ሃላ ዲኦ ማላ ያና፤ ወርሴል ጋካናሰ ኦላይ ጉጂ ጉጂ ባና፤ ባሺ አዋጃቲዳሰ።

²⁷ ሃላቃዚ ዳሮ አሳራ ኢሲ ሳሚንታሰ ጫቂታና፤ ሳሚንታሰ ባጋ ቦላ ያርሾዛኔ ካላ አዋታ ዲጋና፤ ኢሰታሶሆን ባሽ ኤሂዛ ቱናቱል ጸሳ ኬል ጌልፋና፤ ሄሲካ ሃናናይ ሄ ባሻ ካሌሊዛይሳ ቦላ አዋጃቲዳ ቂጻቴይ ፖሌታና ጋካናሳ» ጌዳሰ።

10

ዳኔሊ ጸግርሴ ሻፋ አቻን ዲሼ ቤኢዳ አጂታ

¹ ፓሪሴ ካዋ ቂርሲ ካዋቲዳ ሄዡንሶ ላይላን ቢልጸሶሬ ጌቴቲዛ ዳኔሊ አጂታ ቤኢዳሰ፤ አጂታን ኢዛሰ ዮቴቲዳ ቃላይ ቱማ፤ ሄሲካ ዋልቃማ ኦላ ጊሻሰ ቆንጨሲዛዛ፤ ኢዚ ሄ ኪታ ኤራና ማላ ኢዛሰ አኬካይ አጂታን አሜቲዳሰ።

² ሄ ዋዴ ታኒ ዳኔሊ ሄዡ ሳሚንታ ኩሜሊ ዩካዲሰ።

³ ሄዡ ሳሚንታቲ አፋና ጋካናሰ አሾ ጊዲን ሃራ ሎኦ ካል ማቤኬ፥ ዋይኔ ኡሹ ጋንጸ ኤካቤኬ፤ ሺጨሲዛ ሚሺካ ቲዬታቤኬ።

⁴ ላይላሰ ኮይሮ አገናይ ጌሊዳ ናምኡ ታማኔ ኦይዳንሶ ጋላሰ ታኒ ዋጋ ሻፋ ጸግርሴ አቻን ኤቃዲሰ።

⁵ ታኒ ቶቁ ጋ ጸሊሺን ሌኤ ሃሬ ማይኢዲ ዋርቃ ቃባቶ ዳንጨዳ ኢሲ አሰ ቤያዲሰ።

⁶ ኢዛ ቦላይ ኢንቁ ማላ ጸልቄሰ፤ ኢዛ አይፌሶይ ዋልቃንላ ማላ ፖፖልኡ ጌሰ፤ ኢዛ አይፌቲካ ታማ ላጮ ሚሳቴቲሰ፤ ኢዛ ቶሆቲኔ ኢዛ ኩሼቲ ታማን ቦንቂዳ ጸርቂማላሶ ጸልቄቲሰ፤ ኢዛ ቃላ ጊሪሳይ ዳሮ ዳሬ ቃላ ማላ ኮሹሜሰ።

⁷ ሄ አጂታዛ ታኒ ዳኔሊ ጸላ ቤያዲሰ፤ ሃንኮ ታናራ ዲዛይቲ ጊዲኮ አይኮካ ቤዪቤቴና፤ ኬሂ ዳጋሚዳ ጊሻሰ ባቃቲ ቢዲ ቆቴቲዳ።

⁸ ታኒካ ሄሳ ኬሂ ማላሊሲዛ አጂታ ጸላሼ ታርካ አታዲሰ፤ ታሰ ዲዛ ዋልቃይ ወሪን ዳቡራዲሰ፤ ታ አይፌሶይካ ኬሂ ጌልቂዳሰ።

⁹ ሄሳፌ ጉዬ ቃላ ጨንጉርሰ ሲያዲሰ፤ ታ ሄ ጨንጉርሳ ሲዩዛ ዋዴ ሲንላ ጉል ቢታን ጉፋናዲሰ፤ ዋልቃማ ጲሰኮ ሴራዲሰ።

10 ሄኮ ታና ኢሲ ኩሼይ ቦቺዳሰ፤ ታ ኮኮሪሽን ኢዚ ታና ካሬዲ ታ ኩሼኒኔ ታ ቶሆ ጉልባቴን ኤሲዳሰ።

11 ኢዚካ፡ «ኬሃ ደሴቲዳ ዳኔላ! ሄኮ ታኒ ኔኮ ኪቴታ ያዲሰ፤ ኔኒ ኔ ዲዛሶን ሲቲ ጋ ኤቃ፤ ታ ኔሰ የቲዛይሳ ኣኬካ!» ጌዳሰ። ኢዚ ታሰ ሄሳ የቲን ታኒ ኮኮሪሽ ዳንዳ ኤቃዲሰ።

12 ቃሴካ ኢዚ ታሰ፡ «ዳኔላ ኔኒ ባቦፋ፤ ኔኒ ኣኬካ ዳማናሲኔ ኔና ኔ ጸሳ ሲንፋን ኔ ሁኤ ካዉሾ ደሚዳ ኮይሮ ጋላሳፌ ሃ ሲሚን ኔ ቃላይ ሲዬቲዳሰ፤ ታኒ ኔ ቃላሰ ዛሮ ኤካዳ ሃ ኔኮ ኪቴታ ያዲሰ።

13 ጌደ እቲን ፓሪሴ ካዎቴላ ሃላቃይ ታናራ ናሞኡ ታማኔ ኢሲ ጋላሰ ኤቁቲዳሰ፤ ፋሪሴ ካዎቴላ ታኒ ታኪሲዳይሳ ቤኢዲ ዋና ሃላቃታ፤ ሚካኤሌይ ታና ማዳናሰ ዪዳሰ፤ ታኒካ ኢዛ ፋሪሴ ሃላቃራ ሄን ኣጋዳ ያዲሰ።

14 ኣጁታዚ ፖሌታናሰ ቡሮ ሲንፋፌ ዳሮ ላይላ ዲዛ ጊሻሰ ሲንፋፌ ኔ ዳሬዛ ቦላ ሃናና የኡታ ኔሰ ቆንጪሳናሰ ታ ያዲሰ።

15 ኢዚ ሃይሳ ታሰ የቲዛ ዎዴ ታ ጋናዚ ጳዪን ዱጌ ቢታ ጸላዲሰ።

16 ሄሳፌ ጉዬ ኣሰ ሚሳቲዛዳይ ባ ኩሼ ዬዲዲ ታ ሜቲርሻታ ቦቺዳሰ፤ ታኒካ ኢዛሰ፡ ታ ዶና ዶያዳ ሃሳያ ደማዲሰ፤ ታ ሲንፋን ዲዛይሳ፡ «ታ ጎዳዉ! ሃይሳ ኣጁታ ጋሶን ታ ሳኬታዲሰ፤ ዎልቃይካ ታሰ ዉሪዳሰ።

17 ታኒ ኔ ኦሳንቻዚ ኔናራ ዋና ሃሳያና ዳንዳያዚና? ታ ጎዳዉ! ታሰ ኣቤይ ኢዲዳሰ፤ ታኒ ፔኖ ኬሳ ሼምፓናሰካ ጸኔታዲሰ።

18 ኣሰ ሚሳቲዛ ኪታንቻዚ ቃሴካ ታና ቦቺን ታኒ ሚናዲሰ።

19 ኢዚካ ታና፡ «ኬሃ ደሴቲዳይሶ! ኔሰ ሳሮ ጌዳና፤ ባቦፋ ኣይኮይ ባ ሚና!» ጌዳሰ። ኢዚ ታሰ የቲን ታኒ ሚናዳ፡ «ታ ጎደ! ኔኒ ታሰ ሚኖቴሐ ኢሚዳ ጊሻሰ ኣኔ ኔ የታናይሳ ታሰ የታ!» ጋዲሰ።

20 ኢዚ ቃሴካ ታሰ፡ «ታኒ ኔኮ ኣዛሰ ዪዳኮ ኔኒ ኤራይ? ፓሪሴ ሃላቃ ኦላናሰ ታ ኤሶን ሲማና፤ ታ ሲሚኮ ጊርኬ ሃላቃይ ያና።

21 ኮይሮታዳ ቱማ ማጸፋን ጸፊቲዳይሳ ታ ኔሰ ቆንጪሳና፤ ሃ ሃላቃታራ ታ ኦሌቲሺን ኢንቴ ሃላቃ ሚካኤሌ፤ እቲን ሃራይ ታና ማዲዳይ ባዋ።

11

1 «ሜዶኔ እስ ዳሪዮሲ ካዎቲዳ ኮይሮ ላይል ታኒ ኢዛ ማዳናሲኔ ኢዛ ሚንጮፋናስ ኢዛ አቻን ኤቃ ዳይስ።

፳፻፶ ሳጋ ካዎታኔ ዱጌሃ ሳጋ ካዎታ

2 «ሃኢካ ታኒ ኔስ ቱማ ዮታና፤ ሃራ ሄቩ ካዎቲ ቡሮ ፓሪሴ ቦላ ካዎታና፤ ሄይታ ሄቫታ ካሊዲ ኦይዳንሶ ካዎታና ካዎዚ ሃንኮ ካሴይታ፤ ዱሬቴፋን አቋና፤ ኢዛስ ዱሬቴሌ ኬሂ ዳሪሺን ኢዚ ባ ቦላ ሃራ ካዎታ ጉጂ ኤኪዲ ገሪኬ ካዎቲላ ቦላ ዳንዳና።

3 ሄሳፌ ጉዬ ዋልቃማ ካዎይ ዳንዳና፤ ኢዛ ካዎቲላይካ ገታ ጊዳና፤ ኢዚ ባ ኮዩዳዚ ኡባ አፋና።

4 ጊዶ አቲን ኢዚ ዳሮ ሚኒዳ ዋዴ ኢዛ ካዎቲላይ ላሌታና፤ አላማ ቦላ ኦይዱ ኬዚ ሻኬቲ ዋዴዲ ኦይዱ ሳጋ ባና፤ ኢዛ ዜሬሌ ጊዶንታይቲ ኢዛ ካዎቲላን ካዎታና፤ ጊዲኮካ ኢስታፌ ኢሶይካ ኢዛ ማላ ሚኔና፤ ጋሶይካ ካዎቲላይ ላሌቲን ሃራቲ ጊሼቲ ኤኪዳ ጊሻሳ።

5 «ዱጌሃ ሳጋ ካዎይ ሚናና፤ ጊዶ አቲን ኢዛ ኦላንቻታ አዛዚዛይታ፤ ኢሶይ ካዎዛ፤ ኬሂ ሚናና፤ ኢዛ ካዎቲላይ ኬሂ ገታ ጊዳና።

6 ጉላ ላይላታ፤ ጉዬ ዱጌሃ ሳጋ ካዎይ ፳፻፶ ሳጋ ካዎራ ላጌቴላ ጫቆ ጫቄታና፤ ዱጌሃ ሳጋ ካዎይ ባ ናዮ ፳፻፶ ሳጋ ካዎዛስ ማቾ ሂስቲ ኢማና፤ ጊዶ አቲን ኢዛ ባ ዋልቃ ሚንፋናስ ዳንዳዮንታ ጊሻሲኔ ካዎዛ ዋልቃይ ሚኖንታ ጊሻስ ካሴ ጌሊዳ ጫቆ ቃላዚ ሚኔና፤ ሄሳ ጊሻስ ኢዛ ባና ማዲዛይታራ፤ ባ አዋራኔ ባስ አዛዜቲዛይታራ አሳ ኩሼን አቋ ኢማታና።

7 «ሄራካ ኢዚ ዳቦ ጊዲዳ ኢሳዴይ ኢዚ ሶሆ ኦይካናስ ዳንዳና፤ ፳፻፶ ሳጋ ካዎዛ ኦላንቻታራ ኦላ ኦይኬታና፤ ኢስታስ ኦላ ሚጸካ ሚንሉ ጌሊዲ ኢዚ ኢስታ ጸናና።

8 ኢስታ ኤቃ ጸሳታ ሚስሌታ፤ ቢራፔኔ ዋርቃፌ ኦሴቲዳ ሚሻታ ዲኢ ኤኪዲ ዱጌ ገብጾ ኤፋና፤ ጉላ ላይላታስ ዱጌሃ ሳጋ ካዎይ ፳፻፶ ሳጋ ካዎራ ኦሌቴላ ኤሳና።

9 ሄሳፌ ጉዬ ፳፻፶ ሳጋ ካዎይ ዱጌሃ ካዎይ ሃሪዛ ዴራ ኦላናስ ዋራጃና፤ ጊዶ አቲን ኢዚ ባ ዩዳ ኦጌራ ጉዬ ሲሚ ባቃቲዲ ባ ዴሬ ባና።

10 ፳፻፶ ሳጋ ካዎ አቱማ ናይቲ ኦላስ ጊጌቲሼ ኬሂ ዋልቃማ ኦላንቻታ ሺሻና፤ ሄ ኦላ አሳይካ ባ ሲንፋን ዲዛ ቢታ ሜጪ ኤፊዛ ዋልቃማ ዲኦ ሃላ ማላ ባ ሞርኬ ሚጸ ቦላ ሜቶ ጋፋና።

11 «ሄ ዋዴ ዱጌሃ ካዎይ ኬሂ ሃንቄቲዲ ፑዴሃ ባጋ ካዎራ ኦሌታናስ ዴንዲዴስ፤ ፑዴሃ ባጋ ካዎይ ሺሺዳ ዋልቃማ ኦላንቻቲ ጸኔታና።

12 ዱጌሃ ባጋ ካዎይ ዳሮ ኦላንቻታ ዲኢዳ ዋዴ ባ ዋዚናን ኦቶሬታና፤ ዳሮ ሺያን ቆዴቲዛ ኦላንቻታካ ኢዚ ወርሳና፤ ጊዲኮካ ኢዚ ጸኒዳ ማላ ሚኒ ዴና።

13 ፑዴሃ ባጋ ካዎይ ጌዴ ባ ዴሬ ሲሚዲ ካሴይሳፌ ሚንሊዲ ኦላንቻታ ጊጊሳና፤ ጉላ ላይላታፔ ጉዬ ኢዚ ባ ኦላንቻታ ኩሜላ ኦላ ሚሽ ጊጸሲ ኤኪዲ ያና።

14 «ሄሳፌ ጉዬ ዳሮ አሳይ ዱጌሃ ባጋ ካዎ ቦላ ማካላና፤ ዳኔላ ኔኒ ሃይሳ አጁታዛን ቤኢዲይሲ ወሪካ ፖሌታና ማላ ኔ ባጋ አሳፔ ማካላንቻቲ ቢታ ቦላ ሺሮ ዴንላና ሺን ኢስታ ቆፋይ ፖሌቲና።

15 ሄሳ ጊሻስ ፑዴሃ ባጋ ካዎይ ኢሲ ጊምቤይ ዩዩ አጲዳ ካታማዮ ጊዶሊዲ ኢዞ ኦይካና፤ ዱጌሃ ባጋ ዋታዳራቲ ኢስታራ ኤቄታናስ ዳንዳዬቲና፤ ኢስታ ጋርሳፌ ዶሬቲዳ ሚኖ ኦላንቻቲካ ኢዛራ ኤቄቲ ዳንዳያና ዋልቃይ ኢስታስ ዴና።

16 ፑዴ ባጋፌ ዋራጃናይሲ ባ ኮዪዳ ማላ ኦላና፤ ኢዛራ ኤቄቲ ዳንዳያናይ ዴና፤ ኢዚ ሎኦ ቢታዮ ሃራና፤ ኢዞ ጳይሳናስካ ዋልቃ ዴማና።

17 «ፑዴሃ ባጋ ካዎይ ባ ኦላንቻታ ኩሜላ ሺሺ ኦላስ ዋራጃናስ ቆፓና፤ ሃንኮ ባስ ሞርኬ ጊዲዳ ዱጌሃ ባጋ ካዎራ ሲጌቲዲ ጫቄታና፤ ሄ ካዎዛ ኩንዲሳናስ ባ ናዮ ኢዛስ ማቾ ሂስቲ ኢማና፤ ጊዶ አቲን ኢዛ ቆፋይ ፖሌቲና።

18 ሄሳፌ ጉዬ አባ አቻን ዲዛ ዴሬታ ቦላ ሜቶ ጋሊዲ ኢስታ ሃራና፤ ጊዶ አቲን ኦላንቻታ ሃላቃይ ኢዛ ኦቶሬቲላ ፑርሺሳና፤ ኢዚ ኦሊዳ ኡባ ኢዛ ቦላ ዛራና።

19 ሂስቲዲ ሄ ካዎዚ ካሴ ባ ዴሬ ሚጸታን ሲማና፤ ጊዶ አቲን ጱጴቲዲ ኢዚ ኩንዳና፤ ናሞኣንሉ ቤቲና።

20 «ኢዛሲሆን ሃራ ካዎይ ካዎታና፤ ሄ ካዎቲዳ ካዎዚ ባ ካዎቲላ ቦንቾ ናጋናስ ጊራ ጊሪሲዛ አስ ሹማና፤ ጊዶ አቲን ሄ ካዎዚ ጉላ ዋዴፔ ጉዬ ዴሬይ ዴንዲን ዋይኮ ኦላን ጊዶንታ ኢዚ ጮ ሃይቂ ጳያና።»

ሜንጼ ኢታ ጊዲዳ ፑዴሃ ካዎ

21 ታስ አጁታ ቢርሺዛ ኪታንቻዚ፥ «ኢዛፔ ጉዬ ኢሲ ካጴቲዳ ኢሲ ዴንዳና፤ ኢዛሰ ካዎቲፋ ቦንቾይ አሜቲቤና፤ ጊዶ ኣቲን ዴሬዚ ቆፖንታ ሳሮን ዲሺን ዪዲ ጌኔራ ካዎቲፋ ኦይካና።

22 ሄሳፌ ጉዬ ኢዛራ ኤቄቲዛ ዳሮ ኦላንቻቲ ኢዛ ሲንላፌ ፒቲቲ ጳያና፤ ጫቄሊዛ ሃላቃዚካ ሃይቃና።

23 ኢዚ ኢዛራ ሲጌቲላሰ ጫቄቲዳፔ ጉዬ ጨሞን ጌኔ ኦሶ ኦላና፤ አማርዳ አሳታ ኦይኪዲ ሚኒ ሚኒ ባና።

24 ኢዚ ኬሂ ዱሬቲዳ ዴሬ ቆፖንታ ዲሺን ዋራጂ ኦይካና፤ ካሴ ኢዛ አዋቲ ኦሊ ኤሮንታ ሚሽ ኢዚ ኦላና፤ ኢዚ ዲኢ ኤኪዳይሳ ኡባ ባ ኦላንቻታሰ ጊሼቺ አማና፤ ኦላ ሚጸታ ቦላካ ሜቶ ጋላናሰ ቆፋ ቃቻና፤ ጊዶ ኣቲን ሄሲ ጉላ ዋዳሳ።

25 «ዋልቃማ ኦላንቻታ ጊግሲዲ ኦሌታናሰ ዴጌሃ ባጋ ካዎ ቦላ ዋራጂና፤ ዴጌሃ ባጋ ካዎይካ ባ ባጋራ ዳሮ ዋልቃማኔ ሚኖ ኦላንቻታ ጊግሲዲ ባ ቦላ ዪዛ ኦላ ቲቃናሰ ዴንዳና፤ ጊዶ ኣቲን ኢዛ ቦላ ካሴቲዲ ማቄቲዳ ማቄቲላፌ ዴንዳይሳን ኢዚ ኢሰታራ ኤቄታናሰ ዳንዳዬና።

26 ኢዛራ ኢሲፌ ሚዛ ኢዛ ላጌቲ ኢዛ ጳይሳናሰ ማቄታና፤ ኢዛ ኦላንቻቲ ኡባይ ወራና፤ ዳሮቲካ ኦላን ሃይቃና።

27 ሄሳፌ ጉዬ ሄ ናምኡ ካዎቲ ባንታ ዋዚናን ጌኔ ቆፋ ኦይኪ ኢሲ ማዳፌ ማናሰ ኢሲፌ ኡታና፤ ኢሶይ ኢሳሰ ባሌሶ ዮኦ ሃሳይና፤ ጊዲኮካ ባሬዚ ጋኮንታ ጊሻሰ ኢሰታ ቆፋይ ፖሌቲና።

28 ፑዴሃ ባጋ ካዎይ ባሰ ሺሺዳ አቆታ ኤኪዲ ባ ዴሬ ሲማና፤ ጊዶ ኣቲን ኢዛ ዋዚናይ ጌሻ ጫቆ ቃላ ጳይሳናሰ ዴንዳና፤ ጫቆ ቃላ ቦላ ኢታ ሚሽ ኦላና፤ ሄሳፌ ጉዬ ባ ዴሬ ሲሚ ባና።

29 «ባሬቲዳ ጋላሳን ዴጌሃ ባጋ ዛሪ ዋራጂና፤ ጊዶ ኣቲን ኢዛሰ ካሴይሳ ማላ ሃኔና።

30 ኣርሼይ ወሊዛ ባጋራ ዲዛ ዴሬይ ማርካቤን ዪዲ ኦሊዛ ጊሻሰ ኢዚ ኬሂ ዳጋማና፤ ጉዬ ሲሚ ባና፤ ጌሻ ጫቆ ቃላ ቦላ ሃንቄታና፤ ሲሚዲካ ጌሻ ጫቆ ቃላ ካዲዳይታራ ላጌታና።

31 «ኢዛ ኦላንቻቲ ጸሳ ኬላኔ ዲርሳ ቱኒሳና፤ ሃች ሃች ሺቁዛ ያርሾዛ ዲጋና፤ ባሽ ኤሂዛ ቱናቴላ ቶካና።

32 ካዎዚ ጫቆ ቃላዛ ካዲዳይታ ባሌሊዲ ኦጌፔ ኢሰታ ካሬ ኬሳና፤ ባ ጸሳ ኤሪዛ ዴሬይ ጊዲኮ ጎባና፤ ሚኒካ ካዎዛራ ኤቄታና።

33 «ዳሬ ጊደን ዲዛ አጽ ኤራንቻቲ ዳርታ ታማርሳና፤ ጊዶ አቲን ኢስቲ ጉላ ዋዴስ ታማን ጸጌታና፤ ማሻን ሲፊታና፤ ዲኤታና፤ ኢስቲ ሃሪዳይሲካ ቦንቄቲ ኤኬታና።

34 ሃ ዴጾ ሜቶዚ ኢስታ ቦላ ጋኪዳ ዋዴ ኢስቲ አማርዳ ማዶ ዴማና፤ ዳር አሳቲ ኢስታ ባጋ ሚሳቲዲ ኢስታኮ ሺቃና ሺን ዋዚና፤ ጊዴና።

35 አጽ ኤራንቻታ፤ ኢሶቲ ኢሶቲ ጵጵታና፤ ሄሳሉ ሃኒዲ ወርሴላ ዋዴይ ጋካናስ ኢስቲ ጋጩቲዲ፤ ጌዬዲኔ ኢስታ ቦላ ዋሶይ ባይንዳይታ ጊዲዲ ኬዛና፤ ሄሲ ኡባይ ሃናናይ ጸሲ ባሪዳ ዋዴይ ጋካናሳ።

36 «ፑዴሃ ባጋ ካዋይ ባ ቆፒዳይሳ ኡባ ፖላና፤ ኢዚ ባና ኤቃ ጸሳታ፤ ቦላራ ቶቄ ቶቄ ሂስታና፤ ጸሳታ፤ አጽ ጸሳ ቦላ ሃይሳፊ ካሴ ሴቲቲ ኤሮንታ ጫሻ ቃላ ሃሳያና፤ ጸሳ ሃንቆይ ፖሌታና ጋካናስ ኢዚ ኦሴዛ ኡባይ ኢዛስ ኢንጃታና፤ ካሴ ባሬቲዳይሲ ፖሌታና ቤሴስ።

37 ሃ ካዋዚ ካሴ ባ አዋታ ኤቃ ጸሳታ ካዉሻና፤ ማጫሳቲ ደሲዛ ኤቃ ጸሳታ ኢዚ ሌቃና፤ ኢዚ ባና ኡባፊካ ቦላራ ጸሊዛ ጊሻስ ኤቃ ጸሳታ ኡባ ቄሊ ጋና።

38 ኢስታሶሆን ሚጸታ ጸሳ ቦንቻና፤ ካሴ ኢዛ አዋቲ ኤሮንታ ጸሳስ ዋርቃ፤ ቢራ፤ አሌቆ ሚሻታ፤ አልኦ ሹቻታኔ ሃራ ዳር ኢዋታታ ሺሺዲ ቦንቻና።

39 አላጋ ጸሳታ ማዶን ኢዚ ሚኖ ሚጸታ ዋራጂ ኦይካና፤ ኢዛስ ሃሬቲዛይታ ኬሂ ቦንቻና፤ ዳር ዴሬ ሃራና ማላ ኢስታ ሹማና፤ ቃሴ ቢታኖካ ኢስታስ ሻኪ ሻኪ ኢማና።

40 «ወርሴላ ዋዴይ ጋኪሺን ዱጌሃ ባጋ ካዋይ ፑዴሃ ባጋ ካዋዚ ቦላ ኦላስ ዋራጃና፤ ፑዴሃ ባጋ ካዋይ ፓራ-ጋሬን፤ ቶጋኒኔ ማርካቤታን ጎኤቲዲ ኦላ ኤቄታና፤ ዲኦ ሃላ ማላ ዳር ዴሬታ ዋራጂ ኦይካና።

41 ሎኦ ቢታኖካ ዋራጂ ኦይካና፤ ዳር ዴሬቲ ኢዛ ኩሼን ኩንዳና፤ ጊዲኮካ ኤዶሜይ፤ ሞኦቤይኔ አሞኔ ዴሬቲ ኢዛ ኩሼ፤ አታና።

42 ኢዚ ባ ጎዳቴላ ዳር ዴሬታ ቦላ አሳና፤ ሄ ዋዴ ጊብዴይካ ኢዛ፤ ኬሳ ኤካ አቲኩ።

43 ዋርቃ፤ ቢራኔ ጊብዴ አቆታ ኡባ ቦንቄ ኤካና፤ ሊቢያ አሳይኔ ቶጵያ አሳይ ኢዛስ ሃሬታና።

44 ሄሳፌ ጉዬ እርሼይ ሞኪዛ ባጋራኔ ጉዳሃ ባጋራ ዪዛ ዋሪይ ኢዛ ዳጋንፋና፤ ኢዚ ኬሂ ሃንቄቲዲ ዳር አሳታ ዋፋናሲኔ ቆይሳናሰ ዴንዳና።

45 ኢዚ ባ ካዋቱላ ዲንካኔዛ አባፌኔ ጌሻ ዙማፔ ጊዶን ቶካና፤ ጊዶ አቲን ሄሲ ወሪ ሃኒንካ ኢዛሰ ወርሴል ጊዳና፤ ኢዛ ማዳናይካ ቤቱና» ጊዴሰ።

12

ዋዴ ወርሴል

1 ካሴ ታሰ አጁታዛ ቢርሺዛ ኪታንቻዚ ታሰ፡ «ኔ ዴሪዛ ናጊዛ ጊታ ኪታንቻሰ ሃላቃ ሚካኤሌይ ኢዚ ሄ ዋዴ ቆንጫና፤ አሳ ዜሬሊ ሜዴቶሶፌ ሄ ዋዴ ጋካናሰ ሃኒ ኤርንታ ዋልቃማ ሜቶይ ሃናና፤ ኢሰታ ሱንሳይ ማጻፋን ጸፊቲዳ ኡባ አሳይ አታና።

2 ኢሰቲ ሃይቂን ቢታይ ሚዳይቲ ወሪካ ዴንዳና፤ ኢሰታ ጋርሳፌ ባጋይቲ ሜርና ዴኦሰ፡ ባጋይቲ ሜርና ካወሻሲኔ ዋዴሰ ዴንዳና።

3 ሄ ዋዴ አቶ ኤርንቻቲ ሳሎ ፖኦ ማላ ጸላና፤ ዳርታ ጺሎቴላ ኦጌ ካሌሊዳይቲ ወሪ ሜሪፔ ሜርና ጋካናሰ ሳሎ ጸሊንቲታ ማላ ጸልቃና።

4 «ዳኔል! ኔኒ አላሜ ወርሴሊ ጋካናሰ ሃይሳ ማጻፋዛ ጎርዳዳ ማታሚን ሾጫ፤ ሄ ዋዴ አሳይ ኤራቴል ዳርሳናሰ ያኔ ሃ ዋዴሬታና» ጊዴሰ።

5 ሄሳፌ ጉዬ ታ ሲንላን ሃላ ሻፋ ዶናን ሃራ ናምአታ ሄ ፒንላኒኔ ሃ ፒንላን ኤቂዳይታ ቤአዲሰ።

6 ኢሰታ ጊዶፌ አሳይ ሌኤ ሃሪ ማይኢዲ ሄ ሻፋዛፔ ጉዴ ባጋራ ኤቂዳ ኪታንቻዛ፡ «ሃይቲ ማላሊሲዛ ሃኖቲ ፖሌታናሰ አይ ኬና ዋዴይ አቲዳ?» ጊዲ ኦይቺዴሰ።

7 ሌኤ ሃሪ ማይኢዲ ሻፋፔ ጋና ባጋራ ኤቂዳ ኪታንቻዚ ባ ኩሼታ ጉዴ ሳሎ ዴንሊዲ፡ «ሄሲ ሄቹ ላይሊኔ ባጋ ጋምአና፤ ጌሻ አሳታ ዋልቃይ ወርሺን ሃይቲ ወሪካ ፖሌታና» ጊዲ ሜርናሰ ዴኢዛይሳን ጫቂሺን ሲያዲሰ።

8 ኢዚ ጊዛይሳ ሲያዲሰ ሺን ታሰ ጌሊቤና፤ ሂሰቲን ታኒ፡ «ታ ጎዶ! ሃይሳ ኡባ ወርሴሊ አይ ጊዳኔ?» ጋ ኦይቻዲሰ።

⁹ ኢዚካ ታስ፡ «ዳኔል! ሃይሳ አላሜዛ ወርሴሉ ጋካናስ ሃይሴ ቲንቢቲ ቃላዚ ጎርዴቲዲ ማታሜን ሾጮቲዳ ገሻስ ኔኒ ባ።

¹⁰ ዳሮቲ ቆሬታና፡ ጋጮቲ ጌያናኔ ኢስታ ቦላ ዋሶይ ባይንዳይታ ገዳና፤ ኢታቲ ገዲኮ ባንታ ኢታቴሰ ጉጂ ጉጂ ባና፤ ኢታታፔ ኢሶይካ አኬኬና፤ ገዶ አቲን አቶ ኤራንቻቲ አኬካና።

¹¹ «ጋላስ ጋላስ ሸቂዛ ያርሾይ ዲጌቶሳፌኔ ባሻ ቱናቴሉ ደሜቶሳፌ ሃ ሲሚን 1,290 ጋላስ ገዳና።

¹² ጌንጪዲ 1,335 ጋላሳቲ አቆና ጋካናስ ባ አማኖ ናጊዛይ አንጃቲዳ አሳ።

¹³ «ዳኔል! ኔኒ ወርሴሰ ጋካናስ ባ፤ ሄሳፌ ጉዬ ኔ ሼምፓና፤ ወርሴሳ ጋላስ ኔስ ገጊዳ ጸኒጾ ኔ ላታና» ገዴስ።

ጌሻ ማጸፋ

Gamo: ጌሻ ማጸፋ Bible of Ethiopia, Ethiopic script

copyright © 2024 The Word for the World International

Language: Gamotso (Gamo)

Contributor: The Word for the World Northern Africa

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-03

PDF generated using Haiola and XeLaTeX on 2 May 2025 from source files dated 3 May 2025

d0ee6825-f93e-584e-8c8f-567d8d068e4b